

清

史

稿

清史稿

列傳八

諸王七

高宗諸子

定安親王永璜

端慧太子永璉

循郡王永璋

榮純親王永琪

哲親王永琮

儀慎親王永璇

成哲親王永理

貝勒永璉

慶僖親王永璘

仁宗諸子

穆郡王

惇恪親王綿愷

惇恪親王奕詝

瑞懷親王綿忻

惠端親王綿愉

宣宗諸子

隱志郡王奕緯

順和郡王奕綱

慧質郡王奕繼

恭忠親王奕訢

醇賢親王奕譞

鍾端郡王奕詒

孚敬郡王奕諤

文宗子

憫郡王

高宗十七子孝賢純皇后生端慧太子永璉哲親王永琮皇后納喇氏生貝勒永璘永璟孝儀純皇后生永璐仁宗第十六子慶僖親王永璘純惠皇貴妃蘇佳氏生循郡王永璋質莊親王永塔哲憫皇貴妃富察氏生定安親王永璜淑嘉皇貴妃金佳氏生履端親王永城儀慎親王永璇第九子成哲親王永琿愉貴妃珂里葉特氏生榮純親王永琪舒妃葉赫納喇氏生第十子永城出爲履懿親王允禩後永瑤出爲慎靖郡王允禧後永璟永璐第九子第十子第十六子皆殤無封

定安親王永璜高宗第一子乾隆十三年上南巡還蹕次德州孝賢純皇后崩永璜迎喪高宗斥其不知禮切責之十五年三月薨上諭曰皇長子誕自青宮齒序居長年逾弱冠誕毓皇孫今遭疾薨逝朕心悲悼宜備成人之禮追封定親王諡曰安子綿德襲郡王坐事奪爵弟綿恩襲五十八年進封親王嘉慶四年正月封其子奕紹爲不入八分輔國公八年閏二月有陳德者匿禁門犯蹕

諸王大臣捍禦論功賜綿恩御用補褂進奕紹貝子二十年授御前大臣道光二年薨賜銀五千治喪諡曰恭子奕紹先以上六十萬壽進貝勒至是襲親王十五年奕紹年六十封其子載銓爲輔國公十六年奕紹薨賜銀治喪諡曰端載銓襲載銓初封二等輔國將軍三進封輔國公授御前大臣工部尙書步軍統領襲爵道光末受顧命文宗卽位益用事咸豐二年六月給事中袁甲三疏劾載銓營私舞弊自謂操進退用人之權刑部尙書恆春侍郎書元潛赴私邸聽其指使步軍統領衙門但准收呈例不審辦而載銓不識大體任意顛倒遇有盜案咨部乃以武斷濟其規避又廣收門生外間傳聞有定門四配十哲七十二賢之稱舉所繪息肩圖朝官題詠有師生稱謂爲證上諭曰諸王與在廷臣工不得往來歷聖垂誡周詳恆春書元因審辦案件趨府私謁載銓並未拒絕至拜認師生例有明禁而息肩圖題詠中載齡許誦恆均以門生自居不知遠嫌罰王俸二年所領職並罷九月仍授步軍統領三年加親王銜充辦理巡防事宜二月疏請申明會議傳章報可四年九月病作詔以綿德曾孫溥煦爲

後是月薨追封親王賞銀五千兩治喪諡曰敏溥煦襲郡王光緒三十三年薨  
諡曰慎子毓朗襲貝勒光緒末授民政部侍郎步軍統領宣統二年七月授軍  
機大臣三年四月改授軍諮大臣

端慧太子永璉高宗第二子乾隆三年十月殤年九歲十一月諭曰永璉乃皇  
后所生朕之嫡子聰明貴重氣宇不凡皇考命名隱示承宗器之意朕御極後  
恪守成式親書密旨召諸大臣藏於乾清宮正大光明榜後是雖未冊立已命  
爲皇太子矣今既薨逝一切典禮川皇太子儀注行旋冊贈皇太子諡端慧  
循郡王永璋高宗第三子乾隆二十五年七月薨追封循郡王四十一年以永  
理子綿懿爲後襲貝勒卒子奕緒襲貝子卒子載遷襲鎮國公

榮純親王永琪高宗第五子乾隆三十年十一月封榮親王永琪少習騎射嫻  
國語上鍾愛之三十二年三月薨諡曰純子綿億四十九年十一月封貝勒嘉  
慶四年正月襲榮郡王綿億少孤體弱多病特聽敏工書熟經史十八年林清  
變起綿億方扈蹕聞警力請上速還京師上即日迴鑾因重視之寵眷日渥逾

年薨諡曰恪子奕繪襲貝勒卒子載鈞襲貝子子溥楫襲鎮國公

哲親王永琮高宗第七子與端慧太子同爲嫡子端慧太子薨高宗屬意焉乾隆十二年十二月以痘殤方二歲上諭謂先朝未有以元后正嫡紹承大統者朕乃欲行先人所未行之事邀先人不能獲之福此乃朕過耶命喪儀視皇子從優諡曰悼敏嘉慶四年三月追封哲親王

儀慎親王永璇高宗第八子乾隆四十四年封儀郡王嘉慶四年正月進封親王總理吏部二月罷諭曰六卿分職各有專司原無總理之名勿啓專權之漸十三年正月諭曰內廷行走諸王日入直儀親王朕長兄年逾六十冬寒無事不必進內十四年正月封其子錦志爲貝勒十七年以武英殿刻高宗聖訓誤書廟諱罷王俸三年十八年林清變起賊入禁城綿志從高宗發烏槍殲賊仁宗褒其舊勇加郡王銜加俸歲千兩永璇亦以督捕勦勞免一切處分二十年七月命祭裕陵阻雨還京坐降郡王並奪綿志郡王銜及加俸仍削王俸五年二十四年正月復綿志郡王銜賜三眼孔雀翎七月坐刺探政事上諭曰朕兄

儀親王年已七十有四精力漸衰所領事務甚多恐有貽誤探聽尙有可原朕不忍煩勞長兄致失頤養嗣後止留內廷行走平日不必入直六月綿志坐縱妾父冒職官詐贓奪郡王銜罰貝勒俸四年二十五年七月宣宗即位諭儀親王不必遠迎又諭召對宴賚無庸叩拜道光三年正月綿志復郡王銜加俸八年正月命在紫禁城乘轎並加賞俸銀五千示親親敬長之意十一月復諭朝賀免行禮十年十月永璇詣圓明園視大阿哥徑入福園門諭罷綿志官十一年諭壽皇殿安佑宮當行禮時於府第內行禮又諭元旦暨正月十四日宗親筵宴均免其入宴別頒果毅一席十二年八月薨年八十八賜銀五千治喪親臨賜奠諡曰慎綿志襲郡王薨諡曰順子奕綱襲貝勒加郡王銜卒曾孫毓崐襲貝子卒弟毓岐襲領國公

成哲親王永理高宗第十一子乾隆五十四年封成親王永理幼工書高宗愛之每幸其府第嘉慶四年正月仁宗命在軍機處行走總理戶部三庫故事親王無領軍機者自永理始二月儀親王永璇罷總理吏部並命永理俟軍務奏



銷事畢不必總理戶部三月和珅以罪誅沒其園第賜永琔七月永琔辭總理戶部三庫允之八月編修洪亮吉上書永琔譏切朝政永琔上聞上治亮吉罪語在亮吉傳十月上諭曰自設軍機處無諸王行走因軍務較繁暫令永琔入直究與國家定制未符罷軍機處行走永琔嘗聞康熙中內監言其師少時及見董其昌以前三指握管懸腕作書永琔廣其說作撥鐙法推論書旨深得古人用筆之意上命書裕陵聖德神功碑並令自擇書蹟刻爲詒晉齋帖以手詔爲序刻成頒賞臣工十八年林清變起永琔在紫禁城內督捕上嘉其勤勞免一切處分及未完罰俸二十四年正月加其子不入八分輔國公綏勲郡王銜五月祭地壇終獻時贊引誤永琔依以行禮上以永琔年老多病罷一切差使不必在內廷行走於邸第閉門思過罰親王半俸十年綏勲亦罷內大臣居家侍父二十五年六月綏勲卒贈郡王有司請設以非例斥之著爲令仁宗崩有旨免迎謁語見儀親王傳十月命曾孫戴銳襲貝勒道光二年十月上還自行在永琔進食品十六器以非例卻之二年三月薨年七十二賜銀五千治喪設

曰哲載銳襲郡王繇懃及載銳父奕綬並追封如其爵咸豐九年薨諡曰恭子溥莊襲貝勒加郡王銜卒子毓楹襲貝子

貝勒永璘高宗第十二子乾隆四十一年卒嘉慶四年三月追封貝勒以成親王子繇懃爲後初封鎮國將軍再進封貝子道光十八年正月諭曰繇懃逮事皇祖昔同朕在上書房讀書者只繇懃一人進貝勒二十八年卒子奕綬襲貝子卒弟奕緒襲鎮國公

慶僖親王永璘高宗第十七子乾隆五十四年封貝勒嘉慶四年正月仁宗親政封惠郡王尋改封慶郡王三月和珅誅沒其宅賜永璘五年正月以祝穎貴太妃七十壽未奏明命退出乾清門留內廷行走二十一年正月朔乾清宮筵宴輔國公綿懃就席遲奕紹推令入座拂墮食碗永璘告內奏事太監得旨諸王奏事不得逕交內奏事太監罰永璘俸二十五年三月永璘疾篤上親臨視命進封親王尋薨諡曰僖命皇子往奠上時謁陵歸復親臨焉子綿懃襲郡王綿懃奏府中有毗盧帽門口四座太平缸五十四件銅路鐙三十六對上諭曰

慶親王府第本爲和珅舊宅凡此違制之物皆和珅私置嗣後王貝勒貝子當依會典服物寧失之不及不可僭踰庶幾永保令名府置諸達二亦命裁汰道光三年正月賜綿愍三眼孔雀翎管雍和宮中正殿十六年十月薨賜銀四千治喪諡曰良上命再襲郡王一次以儀順郡王綿志子奕綏爲後襲郡王十七年正月命在御前行走二十二年十月奕綏以服中納妾下宗人府議處奕綏行賕請免永璘第六子輔國公綿性亦行賕覲襲王爵事發奕綏奪爵綿性成盛京以永璘第五子不入八分鎮國公綿悌奉永璘祀旋又坐事降鎮國將軍二十九年卒以綿性子奕劻爲後三十年襲輔國將軍咸豐二年正月封貝子十年正月上三十萬壽進貝勒同治十一年九月大婚加郡王銜授御前大臣光緒十年三月命管理總理各國事務衙門十月進慶郡王十一年九月會同醇親王辦理海軍事務十二年二月命在內廷行走十五年正月授右宗正大婚賜四國正龍補服子載振頭品頂帶二十年太后六十萬壽懿旨進親王二十六年七月上奉太后幸太原命奕劻留京會大學士李鴻章與各國議和二

十七年六月改總理各國事務衙門爲外務部奕劻仍總理部事十二月加載振貝子銜二十九年三月授奕劻軍機大臣仍總理外務部如故尋命總理財政處練兵處解御前大臣以授載振載振赴日本大坂觀展覽會歸請振興商務設商部即以載振爲尙書十月御史張元奇劾載振宴集召歌妓侑酒上諭當深加警惕有則改之無則加勉旋請開缺未許三十年三月御史蔣式瑔奏戶部設立銀行招商入股臣風聞上年十一月慶親王奕劻將私產一百二十萬送往東交民巷英商匯豐銀行收存奕劻自簡任軍機大臣以來細大不捐門庭如市是以其父子起居飲食車馬衣服異常揮霍尙能儲蓄鉅款請命將此款提交官立銀行入股命左都御史清銳戶部尙書鹿傳霖按其事不得實式瑔回原衙門行走三十一年充日俄修訂東三省條約全權大臣三十二年遣載振使奉天吉林按事改商部爲農工商部仍以載振爲尙書三十三年命奕劻兼管陸軍部事東三省改設督撫以直隸候補道段芝貴署黑龍江巡撫御史趙啟霖奏段芝貴善於迎合上年貝子載振往東三省道經天津芝貴以

萬二千金獻妓以獻又以十萬金爲奕劻壽資緣得官上爲罷芝貴而命醇親王載灃大學士孫家鼐按其事不得實奪啟霖官載振復疏辭御前大臣農工商部尙書許之三十四年十一月命以親王世襲宣統三年四月罷軍機處授奕劻內閣總理大臣大學士那桐徐世昌協理大臣八月武昌兵起初命陸軍部尙書蔭昌視師奕劻請於朝起袁世凱湖廣總督視師世凱入京師代奕劻爲內閣總理大臣授奕劻弼德院總裁十二月詔遜位奕劻避居天津後七年薨諡曰密

仁宗五子孝淑睿皇后生宣宗孝和睿皇后生惇恪親王綿愷瑞懷親王綿忻恭順皇貴妃鈕祜祿氏生惠端親王綿愉和裕皇貴妃劉氏生穆郡王穆郡王未命名仁宗第一子二歲薨宣宗即位追封

惇恪親王綿愷仁宗第三子嘉慶十八年林清變起綿愷隨宣宗捕賊蒼震門得旨褒嘉二十四年封惇郡王宣宗即位進親王子奕續封不入八分公道光三年正月命綿愷內廷行走旋以福晉乘輜徑入神武門坐罷罰王俸五年上

奉太后幸綿愷第仍命內廷行走減罰王俸三年七年坐太監張明得私相往來復匿太監苑長青降郡王八年十月追叙蒼震門捕賊急難禦侮復親王諡加意檢束十三年五月綿愷以議皇后喪禮引書百姓如喪考妣四海遏密八音於義未協退出內廷罰王俸十年十八年五月民婦穆氏訴其夫穆齊賢爲綿愷所囚命定郡王載銓按實復降郡王罷一切職任十二月薨復親王上親臨奠諡曰恪奕續前卒追封貝勒命賜福晉郡王半俸二十六年以皇五子奕諒爲綿愷後襲郡王文宗即位命在內廷行走奕諒屢以失禮獲譴咸豐五年三月降貝勒罷一切職任上書房讀書六年正月復封悼郡王十月進親王穆宗即位諡免叩拜稱名同治三年江甯克復封其子載濂不入八分鎮國公載津賜頭品頂帶四年六月授宗令七年正月擒匪逼近畿奕諒陳防守之策八年十一月醇郡王奕譞劾王自授宗令藉整頓之名啓攬權之漸詔兩解之十一年大婚賜紫禁城乘四人肩輿並免進領侍衛內大臣班及帶豹尾槍載濂進輔國公十三年十二月賜親王雙俸光緒五年六月普祥峪吉地工竣復賜

食雙俸十三年上親政免帶領引見十五年正月薨上奉太后臨奠諡曰勤子八有爵者五載濂載漪載潤載瀛載津載濂奕諒第一子初封一等輔國將軍累進輔國公襲貝勒加郡王銜二十五年子溥儀賜頭品頂帶二十六年載濂以庇義和拳奪爵弟載瀛襲載瀛奕諒第四子初封二等鎮國將軍加不入八分輔國公銜襲貝勒載漪奕諒第二子出爲瑞郡王奕誌後獲罪奪爵歸宗語在瑞懷親王綿忻傳載潤奕諒第三子初封三等輔國將軍再進封不入八分輔國公以庇義和拳奪爵戍新疆載津奕諒第五子封二等鎮國將軍加不入八分輔國公銜

瑞懷親王綿忻仁宗第四子嘉慶二十四年封瑞親王道光三年命在內廷行走八年七月薨諡曰懷子奕約甫辟上命定親王奕紹檢察邸第官吏內務府大臣敬徵治家政十月奕約襲郡王子半俸尋更名奕誌三十年五月薨諡曰敏無子賜綿忻福晉郡王半俸咸豐二年福晉薨復賜奕誌福晉郡王半俸十年命以惇親王子載漪爲奕誌後襲貝勒同治十一年大婚命食貝勒全俸光

緒十五年加郡王銜十九年九月授爲御前大臣二十年進封端郡王循故事  
宜仍舊號更曰端者述旨誤遂因之載漪福晉承恩公桂祥女太后姪也二十  
四年太后復訓政二十五年正月賜載漪子溥儀頭品頂帶十二月上承太后  
命溥儀入爲穆宗後號大阿哥命在弘德殿讀書以承恩公尙書崇綺大學士  
徐桐爲之傅明年元旦大高殿奉先殿行禮以溥儀代都下流言將下詔禪位  
大學士榮祿與慶親王奕劻以各國公使有異同諫止二十六年義和拳亂起  
載漪篤信之以爲義民亂遂熾五月命充總理各國事務大臣義和拳擊殺日  
本使館書記杉山彬復及德國使臣克林德圍攻東交民巷使館八月諸國聯  
軍自天津逼京師上奉太后出狩載漪及溥儀皆從次大同命載漪爲軍機大  
臣未逾月罷命奕劻與大學士李鴻章議和諸國目載漪爲首禍十二月奪爵  
戍新疆二十七年十月上奉太后還京師次開封諭載漪縱義和拳獲罪祖宗  
其子溥儀不宜膺儲位廢大阿哥名號賜公銜俸歸宗二十八年六月別以醇  
賢親王奕譞子鎮國公載洵爲奕誌後襲貝勒宣統間爲海軍部尙書改海軍



部大臣加郡王銜

惠端親王綿愉仁宗第五子二十五年七月宣宗即位封惠郡王在內廷行走上書房讀書故事親郡王未及歲食半俸道光九年命食全俸十九年進親王文宗即位諭惠親王爲朕叔父內廷召對及宴賓賞賜宜免叩拜章奏免書名咸豐三年賜御用龍褂洪秀全之徒北擾近畿命爲奉命大將軍頒銳捷刀統健銳火器前鋒護軍巡捕諸營及察哈爾兵哲里木卓索圖昭烏達東三盟蒙古兵與科爾沁郡王僧格林沁督辦防剿僧格林沁出駐涿州綿愉留京師九月會奏頒行銀錢鈔法時秀全兵至深州請發哲里木盟馬隊一千及熱河古北口兵各五百赴涿州助防復奏請發蒙古兵三千以德勒克色楞爲將督兵進擊四年正月命朝會大典外悉免叩拜尋與恭親王奕訢定郡王載銓疏請鑄鐵錢爲大錢輔上令王詳議以行五年四月北路肅清行凱撤禮上奉命大將軍印十二月以鑄鐵錢有效下宗人府議叙八年五月以奏保耆英罷中正殿雍和宮諸職任九年罷鐵錢局十年七月英法二國兵至天津命至通州與

僧格林沁辦防並諭綿愉及怡親王載垣鄭親王端華尙書肅順軍機大臣等  
籌商交涉同治二年穆宗典學太后以綿愉行輩最尊品行端正命在弘德殿  
專司督責並令王子奕詳奕詢伴讀三年十二月薨上親臨奠賜銀五千治喪  
諡曰端子六有爵者三奕詳奕詢奕謨奕詳綿愉第五子初封不入八分輔國  
公賜三眼孔雀翎進鎮國公襲郡王穆宗大婚加親王銜十三年命食親王俸  
光緒十年十月太后萬壽命食親王全俸十一年六月授內大臣十二年正月  
薨諡曰敬子載潤襲貝勒奕詢綿愉第四子初封不入八分輔國公進封鎮國  
公卒無子以愉恪郡王允禩五世孫載澤爲後襲輔國公進鎮國公加貝子銜  
光緒末授度支部尙書奕謨綿愉第五子初封不入八分鎮國公再進封貝子加  
貝勒銜卒以醇賢親王奕謨孫溥佑爲後襲鎮國公

宣宗九子孝全成皇后生文宗孝靜成皇后生順和郡王奕綱慧賢郡王奕繼  
恭忠親王奕訢莊順皇貴妃生醇賢親王奕謨鍾端郡王奕詒孚敬郡王奕誨  
和妃納喇氏生隱志郡王奕緯祥妃鈕祜祿氏生惇勤親王奕諒奕諒出爲惇

恪親王綿愷後

隱志郡王奕緯宣宗第一子嘉慶二十四年封貝勒道光十一年四月薨以皇子例治喪進封隱志貝勒文宗卽位進郡王無子以貝勒綿懿子奕紀爲後襲貝勒卒諡恭勤子溥倫襲貝子進貝勒溥侗授一等鎮國將軍

順和郡王奕綱宣宗第二子二歲殤文宗卽位進封諡

慧質郡王奕繼宣宗第三子三歲殤文宗卽位追封諡

恭忠親王奕訢宣宗第六子與文宗同在書房肄武事共製槍法二十八勢刀法十八勢宣宗賜以名槍曰棣華協力刀曰寶鏢宣威並以白虹刀賜奕訢文宗卽位封爲恭親王咸豐二年四月分府命仍在內廷行走三年九月洪秀全兵逼畿南以王署領侍衛內大臣辦理巡防命仍佩白虹刀十月命在軍機大臣上行走四年迭授都統右宗正宗令五年四月以畿輔肅清予優叙七月孝靜成皇后崩上責王禮儀疏略罷軍機大臣宗令都統仍在內廷行走上書房讀書七年五月復授都統九年四月授內大臣十年八月英吉利法蘭西兵逼

京師上命怡親王載垣尙書穆蔭與議和誘執法使巴夏禮與戰師不利文宗幸熱河召回載垣穆蔭授王欽差便宜行事全權大臣王出駐長辛店奏請飭統兵大臣激勵兵心以維大局克勤郡王慶惠等奏釋巴夏理趣王入城議和英法兵焚圓明園豫親王義道等奏啟城許英法兵入王入城與議和定約悉從英法人所請奏請降旨宣示並自請議處上諭曰恭親王辦理撫局本屬不易朕深諒苦衷毋庸議處十二月奏通商善後諸事初設總理各國事務衙門命王與大學士桂良侍郎文祥領其事王疏請訓練京師旗兵並以吉林黑龍江與俄羅斯相隣邊防空虛議練兵籌餉上命都統勝保議練京兵將軍景淳等議練東三省兵十一年七月文宗崩王請奔赴兩太后召見諭以贊襄政務王大臣端華載垣肅順等擅政狀穆宗侍兩太后奉文宗喪還京師譴黜載垣等授議政王在軍機處行走命王俯世襲食親王雙俸並免召對叩拜奏事書名王堅辭世襲尋命兼宗令領神機營同治元年上就傅兩太后命王弘德殿行走稽察課程三年江寧克復上諭曰恭親王自授議政王於今三載東南兵

事方殷用人行政徵兵籌餉深資贊畫弼亮忠勤加封貝勒以授其子輔國公載澂並封載濬輔國公載溥不入八分輔國公四年三月兩太后諭責王信任親戚內廷召對時有不檢罷議政王及一切職任尋以惇親王奕諒醇郡王奕譞及通政使王拯御史孫翼謀內閣學士殷兆麟左副都御史潘祖蔭內閣侍讀學士王維珍給事中廣誠等奏請任用廣誠語尤切兩太后命仍在內廷行走管理總理各國事務衙門王入謝痛哭引咎兩太后復諭王親信重臣相關休戚期望既厚責備不得不嚴仍在軍機大臣上行走七年二月西捻逼畿輔命節制各路統兵大臣授右宗正十一年九月穆宗大婚復命王爵世襲十二年正月穆宗親政十三年七月上諭責王召對失儀降郡王仍在軍機大臣上行走並奪載澂貝勒翼日以兩太后命復親王世襲及載澂爵十二月上疾有間於雙俸外復加賜親王俸旋復加劇遂崩德宗即位復命免召對叩拜奏事書名光緒元年署宗令十年法蘭西侵越南王與軍機大臣不欲輕言戰言路交章論劾太后諭責王等委靡因循罷軍機大臣停雙俸家居養疾十三年十

月復雙俸自是國有慶屢增護衛及甲數歲時祀事賜神糕節序輒有賞賚以爲常二十年日本侵朝鮮兵事急太后召王入見復起王管理總理各國事務衙門並總理海軍會同辦理軍務內廷行走仍諭王疾未愈免常川入直尋又命王督辦軍務節制各路統兵大臣十一月授軍機大臣二十四年授宗令王疾作閏三月增劇上奉太后三臨視四月薨年六十七上再臨奠輟朝五日持服十五日設曰忠配享太廟並諭王忠誠匡弼悉協機宜諸臣當以王爲法子四載激貝勒加郡王銜諡果敏載溎出爲鍾端郡王奕詒後襲貝勒坐事奪爵歸宗載濬與載溎同時受封載潢封不入八分輔國公載激載濬載潢皆前王卒王薨以載溎子溥偉爲載激後襲恭親王

醇賢親王奕譞宣宗第七子文宗即位封爲醇郡王咸豐九年三月分府命仍在內廷行走穆宗即位諭免宴見叩拜奏事書名迭授都統御前大臣領侍衛內大臣管神機營同治三年加親王銜四年兩太后命弘德殿行走稽察課程十一年進封醇親王十二年穆宗親政罷弘德殿行走德宗即位王奏兩太后

言臣侍從大行皇帝十有三年昊天不弔龍馭上賓仰瞻遺容五內崩裂忽蒙  
懿旨下降擇定嗣皇帝倉猝昏迷罔知所措觸犯舊有肝疾委頓成廢惟有哀  
懇矜全許乞骸骨爲天地容一虛糜爵位之人爲宣宗成皇帝留一庸鈍無才  
之子兩太后下其奏王大臣集議以王奏誠懇請罷一切職任但令照料菩陀  
峪陵工從之命王爵世襲王疏辭不許光緒二年上在毓慶宮入學命王照料  
五年賜食親王雙俸十年恭親王奕訢罷軍機大臣以禮親王世鐸代之太后  
命遇有重要事件與王商辦時法蘭西侵越南方定約罷兵王議建海軍十一  
年九月設海軍衙門命王總理節制沿海水師以慶郡王奕劻大學士總督李  
鴻章都統善慶侍郎曾紀澤爲佐定議練海軍自北洋始責鴻章專司其事十  
二年三月賜王與福晉杏黃轎王疏辭不許鴻章經畫海防於旅順開船塢築  
砲臺爲海軍收泊地北洋有大小戰艦凡五輔以蚊船雷艇復購艦其德漸次  
成軍五月太后命王巡閱北洋善慶從焉會鴻章自大沽出海至旅順歷威海  
煙臺集戰艦合操徧視礮臺船塢及新設水師學堂十餘日畢事王還京奏獎

諸將吏及所聘客將請太后御書牒蠶大沾海神廟太后命於明年歸政王疏言皇帝甫逾志學諸王大臣顛懇訓政乞體念時艱俯允所請俟及二旬親理庶務至列聖宮廷規制遠邁前代將來大婚後一切典禮咸賴訓教臣愚以爲諸事當先請懿旨再於皇帝前奏聞俾皇帝專心大政承聖母之歡顏免官闈之劇務此則非如臣生深宮者不敢知亦不敢言也太后命毋庸議十三年正月上親政四月太后諭預備皇帝大婚當力行節儉命王稽察十四年九月王奏太平湖賜第爲皇帝發祥地世宗以潛邸升爲宮殿高宗諭子孫有自藩邸紹承大統者應用其例太后從之別賜第發帑十萬葺治十五年正月大婚禮成賜金桃皮靴戎服刀增護衛葺治邸第未竟復發帑六萬並進封諸子載灃鎮國公載洵輔國公載濤賜頭品頂帶孔雀翎二月河道總督吳大澂密奏引高宗御批通鑑輯覽略謂宋英宗崇奉濮王明世宗崇奉興王其時議者欲改稱伯叔實人情所不安當定本生名號加以徽稱且言在臣子出爲人後例得以本身封典貤封本生父母况貴爲天子天子所生之父母必有尊崇之典請



飭廷臣議醇親王稱號禮節特旨宣示上即位逾年王密奏臣見歷代繼承大統之君推崇本生父母者備載史書其中有適得至當者焉宋孝宗不改子偁秀王之封是也有大亂之道焉宋英宗之濮議明世宗之議禮是也張璠桂萼之儔無足論矣忠如韓琦乃與司馬光議論牴牾其故何歟蓋非常之事出立論者勢必紛沓擾攘乃心王室不無其人而以此爲梯榮之具迫其主以不得不視爲莊論者正復不少皇清受天之命列聖相承十朝一脈詎穆宗毅皇帝春秋正盛遽棄臣民皇太后以宗廟社稷爲重特命皇帝入承大統復推恩及臣以親王世襲罔替渥叨異數感懼難名原不須更生過慮惟思此時垂簾聽政簡用賢良廷議旣屬執中邪說自必潛匿倘將來親政後或有革弊新進越六年拜相捷徑以危言故事聳動宸聽不幸稍一夷猶則朝廷滋多事矣仰懇皇太后將臣此摺留之宮中俟皇帝親政宣示廷臣世賞之由及臣寅畏本意千秋萬載勿再更張如有以治平嘉靖之說進者務目之爲奸邪小人立加屏斥果蒙慈命嚴切皇帝敢不欽遵不但臣名節得以保全而關乎君子小人消

長之機者實爲至大且要太后如王言留疏宮中大激疏入諭曰皇帝入承大統醇親王奕譞謙卑謹慎翼翼小心十餘年來殫竭心力恪恭盡職每優加異數皆涕泣懇辭前賜杏黃轎至今不敢乘坐其秉心忠赤嚴畏殊常非徒深宮知之最深實天下臣民所共諒光緒元年正月初八日王即有豫杜妄論一奏請俟親政宣示俾千秋萬載勿再更張自古純臣居心何以過此當歸政伊始吳大澂果有此奏特明白曉諭並將王原奏發鈔俾中外咸知賢王心事從此可以共白開名希寵之徒更何所容其覬覦乎十六年正月以上二十萬壽增護軍十五藍白甲五十授載濤二等鎮國將軍十一月王疾作上親詣視疾丁亥王薨年五十一太后臨奠上詣邸成服定稱號曰皇帝本生考稱本生考遵高宗御批仍原封從王志也諡曰賢配享太廟下廷臣議上持服期年縉素輟朝十一日初祭大祭奉移前一日親詣行禮御齊長袍轎轎纓期年內御便殿用素服葬以王祭以天子立廟班諱十八年葬京師西山妙高峯宣統皇帝即位定稱號曰皇帝本生祖考子七德宗其第二子也載洸初封不入八分輔國

公達鎮國公載澧襲醇親王宣統皇帝即位命爲監國攝政王載洵出爲瑞郡王奕誌後載瀾出爲鍾郡王奕詒後宣統間載洵爲海軍部大臣載瀾爲軍諮府大臣主軍政三年十月並罷十二月遜位

鍾端郡王奕詒宣宗第八子文宗即位封爲鍾郡王穆宗即位命免宴見叩拜奏事書名同治三年分府仍在內廷行走七年十一月薨諡曰端無子以恭忠親王奕訢子載瀾爲後襲貝勒坐事奪爵歸宗又以醇賢親王奕譞子載瀾爲後襲貝勒加郡王銜

孚敬郡王奕譞宣宗第九子文宗即位封孚郡王穆宗即位命免宴見叩拜奏事書名同治三年分府仍在內廷行走命管樂部十一年授內大臣加親王銜德宗即位復命免宴見叩拜奏事書名光緒三年二月薨諡曰敬無子以愉恪郡王允禩四世孫奕棟子載沛爲後襲貝勒卒又以奕瞻子載澍爲後襲貝勒坐事奪爵歸宗又以貝勒載瀛子溥忻爲後封貝子

文宗二子孝欽顯皇后生穆宗玖貴妃徐佳氏生憫郡王

憫郡王生未命名殤穆宗即位追封

論曰莊親王佐太祖建業將出師登龍而謀策定馳而下黃道周亟稱其驍勇太祖崩諸子嗣業未有成命禮烈親王擁立太宗親爲扞禦邊圉夏允彝以爲行事何減聖賢蓋雄才讓德雖在敵國不能掩也睿忠親王手定中原以致於世祖求之前史實罕其倫徒以執政久威福自專其害肅武親王相傳謂因師還賜宴拉殺之又或謂還至郊外遇伏死死處即今葬地傳聞未敢信然其慘酷可槩見矣身後蒙謗僅乃得雪亦有以取之也聖祖遇諸宗人厚遺詔猶以禮親王饒餘親王子孫安全拳拳在念然當用兵時諸王貝勒爲帥小違律必議罰且不得以功掩義以行法仁以睦親固不相悖也雍正中允禩允禔之獄世宗後亦悔之怡賢親王特剛謹渥加寵榮示非寡恩誠以尺布斗粟相逼笞過甚恟勤郡王嘗握兵柄非母弟亦豈得倖生耶時去開國未遠以尙武爲家法其失則獷太宗屢諭諸子弟當讀書懋厚公承其教彬彬有東丹王之風高宗諸子多擅文學尤以成哲親王爲最詞章書翰無媿古人恭忠親王繼以起

綢繆宮府定亂綏疆能不生懟用不辭勞有純臣之度焉醇賢親王尊爲本生親乾乾翼翼靡間初終預絕治平嘉靖之議載在方策彰彰邁前代遠甚迨時移勢易天方降割乃以肺腑之親寄腹心之重漠然不知陰雨之已至一發而不可復收天歟人歟亡也忽諸尤足爲後來之深鑒矣



都指揮巫凱以聞成祖命發粟賑之猛哥帖木兒者亦女真頭人其弟曰凡察與阿哈出父子並起明析置建州左衛處之以爲指揮使十一年十月與釋加奴猛哥不花同朝於明十四年釋加奴猛哥不花朝於明爲所屬乞官十五年二月猛哥不花朝於明十二月釋加奴上言顏春頭人月兒速哥率其孥來歸請屬於建州釋加奴猛哥不花猛哥帖木兒屢爲所屬乞官十八年閏正月成祖命無功不得乞官賜敕戒諭之十九年十月猛哥不花朝於明廿年正月成祖親征出塞猛哥不花率子弟及所屬從賜弓矢裘馬二十二年三月成祖復親征出塞猛哥不花使所屬指揮僉事王吉從成祖嘉賚之七月成祖崩宣德元年正月猛哥不花猛哥帖木兒朝於明是月壬子進猛哥帖木兒爲都督僉事釋加奴已前卒三月辛丑以其子李滿住爲都督僉事九月丁巳進猛哥不花爲中軍都督同知仍掌毛憐衛二年二月猛哥不花使貢馬旋卒四月命餼其孥猛哥不花子二撒滿哈失里官保奴撒滿哈失里蒙其祖阿哈出賜姓爲李氏四年三月壬子明以爲都督僉事五年三月官保奴朝於明四月李滿住

上言求市於朝鮮朝鮮不納宣宗敕諭聽於遼東境上通市六年正月釋加奴妻唐氏朝於明二月撒滿哈失里朝於明七年二月猛哥帖木兒使其弟凡察朝於明三月壬戌明以爲都指揮僉事八年二月庚戌進猛哥帖木兒爲右都督凡察都指揮使六月撒滿哈失里朝於明是年七姓野人木答忽等糾阿速江等衛頭人弗答哈等掠建州衛殺左衛都督猛哥帖木兒及其子阿古凡察告難於明會明使都指揮裴俊如幹木河中途遇寇凡察以所屬赴援有功九年二月癸酉進凡察都督僉事掌衛事敕諭木答忽等還所掠人馬貲財且赦其罪是月撒滿哈失里母金阿納失里朝於明宣德十年正月宣宗崩是月李滿住撒滿哈失里上言忽刺溫境內野人那列禿等掠所屬那顏寨敕諭那列禿等還所掠人馬貲財並以責弗答哈等四月撒滿哈失里朝於明正統元年閏六月李滿住使其子古納哈等朝於明還遼東逃人明英宗嘉其效誠賜綵緞冠服並上章嘗忽刺溫野人相侵乞徙居遼陽猪婆江英宗命遼東總兵官巫凱計議安置毋弛邊備毋失夷情二年正月凡察使所屬指揮同知李伍哈



朝於明上章言居鄰朝鮮爲所困欲還建州又爲所阻乞朝命英宗賜敕撫諭五月撤滿哈失里朝於明自陳願留京師自効前撤滿哈失里已進都督同知英宗命仍掌毛憐衛事賜勅遣之是時李滿住掌建州衛凡察掌建州左衛與撤滿哈失里並奉職貢惟謹而故建州左衛都督猛哥帖木兒死七姓野人之難子阿古殉焉諸子董山綽顏依凡察以居是年十一月以董山爲本衛指揮使三年正月凡察朝於明是月壬子英宗賜以敕曰往者猛哥帖木兒死七姓野人之難失其印宣德間別鑄印畀凡察董山上言舊印故在而凡察復請留新印一衛二印無故事勅至爾等協同署事遣使上舊印凡察董山爭衛印自此始六月李滿住使所屬指揮趙歹因哈上章言自徙居豬婆江屢爲朝鮮侵掠今復徙居竈突山東南渾河上爲朝廷守邊圉罔敢或違別疏又言毛憐衛印爲指揮阿里所匿請別鑄印畀撤滿哈失里英宗不許命撤滿哈失里奏事附李滿住以達四年四月李滿住上言都督凡察指揮童倉爲朝鮮所誘叛去童倉即董山譯音異也英宗敕朝鮮國王李禔問狀禔疏自明非誘英宗命凡

察童倉卽居鏡城復敕禰撫諭之五年四月英宗以李滿住與福餘衛韃靼相  
侵盜敕遼東總兵曹義備邊九月朝鮮國王李禔上言凡察童倉復逃還建州  
總兵曹義亦疏陳凡察等去鏡城率叛軍馬哈刺等四十家至蘇子河乏食英  
宗敕義使編置三土河及猪婆江迤西冬古河兩界間仍依李滿住以居發粟  
賑之賁逃軍馬哈刺等命還伍復諭禰使歸其種人留朝鮮境者是時凡察以  
都督董山以指揮同領建州左衛其徙居鏡城復還六年正月戊午進董山爲  
都督僉事二月朝鮮國王李禔上言凡察舊居鏡城阿木河其兄猛哥帖木兒  
臣祖授以萬戶創公廨與婢僕衣糧鞍馬臣父又授以上將軍及死七姓野人  
之難其子阿古殉焉屋宇貨產焚掠殆盡臣撫恤凡察如先臣撫恤其兄近歲  
徙居東良後乃潛逃與李滿住同處此時臣不及知安有追殺或有留者非懷  
土不去則同類開諭而還非臣阻之也李滿住昔居猪婆江在臣國邊境鹽米  
醴醬隨其所索時時給與後引忽刺溫劫掠臣邊不已今凡察與同惡謀與忽  
刺溫等來侵請飭凡察等過返舊居庶小國邊民獲免寇盜英宗敕禰謹爲備

會凡察上言不敢爲非敕遼東總兵曹義遣使諭之並廉其情爲凡察董山爭衛印數年而不決七年二月甲辰英宗用總兵官曹義議析置建州右衛凡察董山皆進都督同知董山以舊印掌左衛凡察以新印掌右衛敕分領所屬守法安業毋事爭鬪董山凡察及李滿住各爲所屬乞官皆許之自是歲有干請久次乞進秩物故乞襲職以爲常撤滿哈失里朝於明三月丁丑進右都督別錦毛憐衛印畀之五月英宗以凡察等屢言朝鮮留其部衆使錦衣衛指揮僉事吳良齋勅往勘凡察所索董阿哈里等居朝鮮久受職事守邱墓皆自陳不願還而以十人還李滿住八年十月李滿住使報兀良哈將入寇英宗命僉都御史王黼勅兵爲備九年正月李滿住等上言指揮耶克苦等還自朝鮮乞賑英宗命發粟賑之十二月董山凡察朝於明十年正月撤滿哈失里朝於明十一年二月以董山弟綽顏爲副千戶十二年正月進李滿住爲都督同知六月以聞瓦剌將寇邊敕建州三衛李滿住董山凡察等使爲備十三年正月復敕戒李滿住等毋爲北虜誘十二月董山凡察朝於明十四年凡察妻朵兒眞索

朝於明進皇太后塔納珠二顆寶以紵絲表裏既而額森入寇建州三衛亦屢犯邊景泰中王翱巡撫遼東使招諭復叩關天順二年正月李滿住朝於明二月進董山右都督時董山陰附朝鮮朝鮮授以中樞密使巡撫遼東都御史程信調得其制書以聞英宗使詰朝鮮及董山皆懼服貢馬謝五年十二月朝鮮國王李瑄上言建州衆夜至義州江殺並江收不民掠男婦牛馬下兵部議以爲朝鮮嘗誘殺毛憐衛都督耶卜兒哈致寇乃自取置勿問八年春正月英宗崩成化元年正月董山朝於明自陳防邊有勞乞進秩憲宗不許賜以綵緞十月整飭邊備左都御史李秉上言建州毛憐海西諸部落入貢邊臣驗方物貂必純黑馬必肥大否則拒不納今諸部落結福餘三衛屢犯邊貢使至使者不宜過持擇召邊蠻憲宗命從之二年十一月秉上言毛憐諸衛犯邊官兵擊破之十二月復入犯總兵武安侯鄭宏戰敗三年正月秉上言董山歸所掠邊人請贖俘憲宗敕獎董山因戒責建州毛憐諸衛旋使錦衣衛署都督僉事武忠將命撫諭是月海西建州諸衛復入鴉鵲關都指揮鄧佐禦諸蠻嶺中伏死副

總兵施英不能救三月復入連山關掠開原撫順鐵嶺寧遠廣寧及忠至董山等受撫四月偕李古納哈等朝於明憲宗使集闕下宜詔赦其罪董山等頓首聽命五月己丑復以左都御史李秉提督軍務武靖伯趙輔佩靖虜將軍印充總兵官發兵討建州而董山等留京師會賜宴其從者語嫚辱庖人銅牌事聞有詔切責既而予馬值資綵幣如故事董山李古納哈乞蟒衣玉帶金頂帽銀酒器憲宗命增賜衣帽人一具董山又言指押可昆等五人有勞乞賜憲宗命賜衣人一襲董山等辭歸鴻臚寺通事署丞王忠奏董山等罵坐不敬貪求無厭揚言歸且復叛請遣官防送憲宗命禮部遣行人護行復賜敕戒諭董山等既行憲宗復用禮部主事高岡議命趙輔紮董山寨上輔留董山等廣寧令遣使戒所屬毋更盜邊七月庚申輔召董山等聽宣敕未畢董山等爲嫚語袖出刃刺譯者吏士格鬥殺董山等二十六人憲宗命發兵益秉輔東征敕安撫毛憐海西諸衛示專討建州九月分道出師左軍渡渾河越石門至分水嶺右軍度鴉鵂關踰鳳凰城摩天嶺至猪婆江中軍下撫順經薄刀山過五嶺渡蘇

子河至虎城攻破張打必納戴咬納朗家噉哈諸寨四戰皆捷十月師還乘上  
疏請增兵戍遼陽於鳳凰山鴉鵲關撫順奉集通遠諸路度地築城堡選將吏  
習邊事者鎮開原憲宗悉從之四年正月朝鮮國王李瑒上言遣中樞府知事  
康純等將兵征建州渡鴨綠潑猪二江破兀彌府諸寨禽李滿住及其子古納  
哈等多所俘馘使獻俘自阿哈出始領建州衛傳其子釋加奴及孫李滿住析  
左衛猛哥帖木兒領之死而弟兒察代既復傳其子董山析右衛移兒察領之  
其入邊爲亂董山爲之渠明既殺董山朝鮮亦破李滿住其子古納哈同死他  
子都喜亦的哈後不著凡察正統後不復見當已前死其子不花禿不與董山  
之亂獨全他子阿哈答營朝於明爭賜幣不及例五年六月建州左衛都指揮  
佟那和劄等上章爲董山子脫羅等李古納哈孫完者禿乞官兵部請進止憲  
宗命授脫羅都指揮同知完者禿都指揮僉事自是凡從董山爲亂者其子姓  
降一等仍襲職六年正月建州三衛頭人沙加保等三百餘人朝於明憲宗敕  
示威德俾復奉朝貢居數年太監王直擅政欲以邊功自重巡撫遼東右副都

御史陳銀阿直意十三年十二月上章言建州三衛爲邊患請聲罪致討十四年六月命兵部侍郎馬文升及銀會議招撫文升上言建州左右二衛掌印都指揮脫羅卜花禿等一百九十五人建州衛掌印都指揮完者禿等二十七人先後應命宣敕撫慰遣還卜花禿即不花禿凡察子也九年十二月十一年正月再入朝至是同受招撫尋復命直詣遼東處置邊務直至邊銀復請用兵十五年十月命直監督軍務撫寧侯朱永佩靖虜將印充總兵官銀參贊軍務討建州三衛並敕朝鮮國王李嫫發兵夾擊十一月永等分道出撫順關建州人拒守縱擊破之有所俘馘師還永等受上賞十六年六月建州復寇邊巡按遼東御史強珍疏論銀等啓釁冒功下吏議汪直憾珍劾珍欺罔逮治謫戍銀尋罷去十八年直亦得罪建州三衛奉朝貢如故弘治初脫羅完者禿皆進都督孝宗之世脫羅三朝完者禿五朝明賜完者禿大帽金帶正德元年脫羅卒以其子脫原保襲都督僉事二年四月卜花禿卒賜祭武宗之世脫原保三朝嘉靖間建州衛都督方巾左衛都督章成古魯哥右衛都督阿刺哈眞哥騰力革

輩見於明實錄皆不知其世蓋自李滿住死復傳其孫完者禿阿哈出之後可紀者四世其別子猛哥不花領毛憐衛傳子撒滿答失里後不著董山死傳其子脫羅及孫脫原保猛哥帖木兒之後可紀者三世其弟凡察傳子不花禿後不著迨嘉靖季年王杲強而阿哈出猛哥帖木兒之族不復見

王杲不知其種族生而黠慧通番漢語言文字尤精日者術嘉靖間爲建州右衛都指揮使屢盜邊三十六年十月窺撫順殺守備彭文洙遂益恣掠東州惠安堵牆諸堡無虛歲四十一年五月副總兵黑春帥師深入王杲誘致春設伏媳婦山生得春磔之遂犯遼陽劫孤山略撫順湯站前後殺指揮王國柱陳其孚戴冕王重爵楊五美把總溫燮于樂王守廉田耕劉一鳴等凡數十輩當事議絕貢市發兵剿尋又請貸杲不爲悛隆慶末建州哈哈納等三十人款塞請降邊吏納焉王杲走開原索之勿予乃勒千餘騎犯清河游擊將軍曹憲伏道左突起斬五級王杲遁走故事當開市守備坐聽事諸部酋長以次序立堂上奉土產乃驗馬馬即羸且跛並予善值贖其欲乃已王杲尤桀驁擅酒飲至醉



使酒箕踞罵坐六年守備賈汝翼初上爲亢厲抑諸酋長立階下諸酋長爭非故事盡階進一等汝翼怒抵几叱之視戲下簋不下者十餘人驗馬必肥壯王杲鞅鞅引去椎牛約諸部殺掠塞上是時哈達王台方強諸部奉約束邊將檄使諭王杲王杲訟言汝翼摧抑狀巡撫遼東都御史張學顏以聞下兵部議令遼東鎮撫宣諭示以恩威於是王台以千騎入建州寨令王杲歸所掠人馬盟於撫順關下而罷學顏復以聞賚王台銀幣萬厯二年七月建州奈兒禿等四人款寨請降來力紅追亡至塞上守備裴承祖勿予追者縱騎掠行夜者五人以去承祖檄召來力紅令還所掠亦勿予是時王杲方入貢馬二百匹方物三十駄休傳舍承祖度王杲必不能棄輜重而修怨於我乃率三百騎走來力紅寨諸部圍之未敢動王杲聞耗驚馳歸與來力紅入謁承祖而諸部圍益衆王杲曰將軍幸毋畏倉卒聞將軍至皆匍匐願望見承祖知其詐呼左右急兵之擊殺數十人諸部皆前門殺傷相當來力紅執承祖及把總劉承奕百戶劉仲文殺之於是學顏奏絕王杲貢市邊將復檄王台使捕王杲及來力紅王台送

王杲所掠塞上士卒及其種人殺漢官者王杲以貢市絕部衆坐困遂糾土默特泰寧諸部圖大舉犯遼瀋總兵李成梁屯瀋陽分部諸將楊騰駐鄧良屯王維屏駐馬根單曹簠馳大衝挑戰王杲以諸部三千騎入五味子衝明軍四面起諸部兵悉走保王杲寨王杲寨阻險城堅塹深謂明軍不能攻成梁計諸部方聚處可坐縛十月勒諸軍具礮石火器疾走圍王杲寨斧其柵數重王杲拒守成梁益揮諸將冒矢石陷堅先登王杲以三百人登臺射明軍明軍縱火屋廬芻茭悉焚烟蔽天諸部大潰明軍縱擊得一千一百四級往時剖承祖腹及殺承奕者皆就馘王杲遁走明軍車騎六萬殺掠人畜殆盡三年二月王杲復出謀集餘衆犯邊復爲明軍所圍王杲以蟒褂紅甲授所親阿哈納陽爲王杲突圍走明軍追之王杲以故得脫走重古路將往依泰寧衛速把亥明軍購王杲急王杲不敢北走假道於王台邊吏檄捕送七月王台率子虎兒罕赤縛王杲以獻檻車致闕下磔於市王杲嘗以日者術自推出亡不即死竟不驗妻孥二十七人爲王台所得其子阿台脫去阿台妻清景祖女孫也王台卒阿台思

報怨因誘葉赫楊吉砮等侵虎兒罕赤總督吳兌遣守備霍九皋諭阿台不聽  
李成梁率師禦之曹子谷大梨樹佃大破之斬一千五百六十三級四年春正  
月阿台復盜邊自靜遠堡九臺入既又自榆林堡入至渾河既又自長勇堡入  
薄渾河東岸又糾土蠻謀分掠廣寧開原遼河阿台居古勒寨其黨毛憐衛頭  
人阿海居莽子寨兩寨相與爲犄角成梁使裨將胡鸞備河東孫守廉備河西  
親帥師自撫順王剛台出寨攻古勒寨寨陟峻三面壁立濠塹甚設成梁麾諸  
軍火攻兩晝夜射阿台殪別將秦得倚已先破莽子寨殺阿海斬二千二百二  
顯祖皆及於難語詳太祖紀同時又有王兀堂亦不知其種族所居寨距遼陽  
十二級清景祖二百五十里遼陽故通市王兀堂初起奉約束惟謹萬曆三年  
李成梁策徙孤山險山諸堡拓境數百里斷諸部窺塞道王杲旣擒張學顏行  
邊王兀堂率諸部酋環跪馬前謂徙堡塞道不便行獵請得納質子通市易鹽  
布學顏以請神宗許之開原撫順清河遼陽寬奠通布市自此始當是時東方  
諸部落自撫順開原而北屬海西王台制之自清河而南抵鴨綠江屬建州王

兀堂制之頗守法已漸竊掠東州會安堡七年七月開市寬奠參將徐國輔縱其弟若僕滅直強黨參毆種人以回易至者幾斃諸部皆忿數掠寬奠永奠新奠諸堡他曾修馬兒等牧松子嶺闌入林剛谷巡撫都御史周詠等劾國輔能之諭王兀堂戢諸部八年三月王兀堂及他曾趙鎖羅骨等以六百騎犯靈陽及黃關嶺指揮王宗義戰死四月又以千騎自永奠堡入成梁帥師擊敗之斬七百五十級俘一百六十人十一月復自寬奠堡入副總兵姚大節帥師擊敗之斬六十七級俘十一人王兀堂自是遂不振不復通於明當隆慶之世下逮萬厯初建州諸衛以都督奉朝貢者建州衛則有納答哈納木章左衛則有大疼克八汗馬哈塔台右衛則有八當哈來留住松塔而王杲自指揮使遷何秩不可考見王兀堂并不著其官然皆強盛爲大酋自王杲就擒後五年而王兀堂敗又後三年而阿台死太祖兵起

論曰建州之爲衛始自阿哈出枝幹互生左右析置自永樂至嘉靖一百五十餘年而阿哈出之世絕王杲乘之起父子弄兵十餘年乃滅其在於清猶爽鳩

季前之於齊所謂因國是也或謂猛哥帖木兒名近肇祖諱子若孫亦相同然清先代遘亂幼子范察得脫數傳至肇祖始克復仇而猛哥帖木兒乃被戕於野人安所謂復仇若以范察當凡察凡察又親猛哥帖木兒弟也不得爲數傳之祖清自述其宗系而明乃得之於簡書春秋之義名從主人非得當時紀載如元秘史者固未可以臆斷也隆慶萬厯間建州諸部長未有名近興祖諱者太祖兵起明人所論述但及景顯二祖亦未有謂爲董山裔者信以傳信疑以傳疑今取太祖未起兵前建州三衛事可考見者著於篇以阿哈出王杲爲之綱而其子弟及同時並起者附焉



哈達遂爲其部長明以其偵寇功授都督僉事葉赫部長褚孔格數爲亂旺濟外蘭執而慘之奪其貢勅七百道及所部十三寨後其部衆叛旺濟外蘭爲所殺其子博爾坤舍進殺父仇迎從兄萬於綏哈城還長其部萬能用其衆略隣部遠交而近攻勢益盛遂以哈達爲國稱汗興祖諸子環居赫圖阿喇號寧古塔貝勒與董鄂部構釁興祖第三子索長阿爲其子吳泰娶萬女蓋嘗乞兵於萬以禦董鄂部萬居靜安堡外室廬耕植與他部落異事明謹是時王杲領建州與韃靼東西遙應窺遼塞萬支柱其間不令合明使繼其大父克什納爲都督王杲盜邊開原備兵副使王之弼檄萬令王杲還所掠萬入建州寨要王杲盟於撫順關下復通市如故土默特徙帳遼東萬入貢多奪其馬已而土默特弟韋徵與萬爲婚其從子小黃台吉擁五萬騎介葉赫復請婚於萬萬懼而許之小黃台吉以馬牛羊甲冑貂豹之裘遺萬築壇刑白馬爲盟約毋犯塞居無何小黃台吉要萬犯塞萬不可乃罷時爲萬厯元年明年王杲亂遼東巡撫張學顏檄萬捕王杲萬令海西建州諸酋款塞乞先開市游擊丁傲語之曰必得

王杲而後市可圖也萬復率建州衛都督大疼克等叩關督撫以聞許開市遂縛獻王杲所掠遼軍八十四人及種人兀黑以兀黑嘗殺漢官也又明年捕得王杲檻致京師明進萬右柱國龍虎將軍官二子都督僉事賜黃金二十兩大紅師子紵衣一襲是時萬所領地東則輝發烏喇南則建州北則葉赫延袤千里保塞甚盛萬暴而黷貨以事赴訴視賂有無爲曲直部下皆效之使於諸部驕恣無所忌求賄獵犬雞豚惟所欲使還意爲毀譽萬輒信之以是諸部皆貳而葉赫部長清佳砮楊吉砮兄弟以父褚孔格見慘心怨萬萬納其女弟溫姐又以女妻楊吉砮弟翼之萬老而衰楊吉砮復婚於哈屯恍惚太勢漸張萬子扈爾干尤暴所部或去從楊吉砮構烏喇與扈爾干爲仇遂收故所部諸寨爲旺濟外蘭所侵者取其八寨惟把太等五寨尙屬萬自是輝發烏喇諸部皆不受約束萬地日蹙憂憤不自憫萬歷十年七月萬卒葉赫聞萬死使求故貢勅扈爾干曰我父以汝兄弟故卒用憂憤死今尙問勅書乎勿與告哀於明明以萬忠賜祭子綵幣四表裏萬有子五扈爾干爲長仲叔皆前死季孟格



布祿溫姐子也又有康古魯爲萬外婦子萬卒康古魯與扈爾干爭父業扈爾干怒曰汝我父外婦子也寧得爭父業乎不避我我且殺汝康古魯因亡抵清佳砮清佳砮妻以女是時太祖初起兵八月扈爾干以兵從兆佳城長李岱奴太祖所屬瑚濟寨太祖部將安費揚古巴遜以十二人追擊殺哈達兵四十人還所掠扈爾干旋卒孟格布祿年十九襲父職龍虎將軍左都督衆未附康古魯聞扈爾干死遂還蒸溫姐扈爾干有子曰岱善與康古魯孟格布祿析萬遺業爲三康古魯報扈爾干之怨釋憾於其子孟格布祿亦以母溫姐故助康古魯共攻岱善而清佳砮楊吉砮兄弟謀攻萬子孫報仇十一年七月挾煖兔恍惚太等萬騎來攻叻總督侍郎周詠念岱善弱孟格布祿少請加勅部諸酋神宗許之十二月楊吉砮等復挾蒙古科爾沁貝勒衮阿岱等萬騎來攻孟格布祿及岱善以二千騎迎戰而敗自是兵屢至恣焚掠不已十二年明總兵李成梁誘殺清佳砮楊吉砮兄弟所部誓服誓受孟格布祿約束葉赫難始紓而內訌復急清佳砮子布寨楊吉砮子納林布祿乘隙圖報怨十五年四月納林布

祿以恍惚太萬騎攻把泰梁明兵來援圍解乃陰結其姑溫姐嗾孟格布祿佐  
康古魯圖岱善先是扈爾干許以女歸太祖十六年岱善親送以往太祖爲設  
宴成禮是年納林布祿復以恍惚太五千騎圍岱善孟格布祿將其孥從納林  
布祿往葉赫居十八里窰於是圖岱善益急而康古魯誘岱善所部叛岱善略  
其資畜納林布祿並掠岱善妻哈爾屯以去明邊吏議絕孟格布祿市以所部  
及土田牲畜盡歸於岱善孟格布祿不聽復與布寨納林布祿康古魯入開原  
溫姐偕開原兵備副使王緘令裨將襲其營執溫姐康古魯以歸巡撫顧養謙  
諭孟格布祿和岱善還所掠否則斷若母頭矣王緘以爲戮溫姐則孟格布祿  
益攜不如釋之而囚康古魯待朝命溫姐既得脫遁還孟格布祿自葉赫攻岱  
善自焚其所居劫溫姐去王緘坐是奪職十六年二月河西大饑岱善乞糴於  
明明予粟百斛李成梁出師討布寨孟格布祿圍其城布寨孟格布祿請降成  
梁振旅還開原兵備副使成遜議釋康古魯和諸部總督侍郎顧養謙亦謂岱  
善弱而多疑即殲諸酋立之不能有其衆不如釋康古魯使和岱善則萬子孫

皆全岱善內倚中國外結建州陰折北關謀實制東陲勝策也夏四月遂釋康古魯而諭之曰中國立岱善以萬故囚汝以助北關侵岱善也汝亦萬子不忍殺今釋汝和諸酋修父業岱善安危汝則任之康古魯聽命因令岱善以叔父事康古魯以祖母事溫姐刑牲盟且進布寨納林布祿使者誠諭之爲均兩部敕孟格布祿出岱善妻子五人及所部種人三百二十三婦稚五百四十三馬牛羊數百歸岱善康古魯偕溫姐歸故寨居月餘康古魯病且死語溫姐及孟格布祿戒部曲毋盜邊負明恩康古魯死孟格布祿謀盡室徙依葉赫度溫姐不從微告布寨納林布祿以兵至孟格布祿縱火燔其居趣溫姐行溫姐不可強扶持上馬鬱鬱不自得七月亦死布寨納林布祿誘孟格布祿圖岱善如故成遜令諸酋面相要釋憾並入貢而太祖日強盛布寨納林布祿與有隙二十一年夏六月糾孟格布祿及烏喇輝發四部合兵攻太祖略戶布察寨太祖率兵追之設伏於中途引兵略哈達富兒家齊寨哈達兵至太祖欲引敵至設伏所揮衆使退以單騎殿孟格布祿以三騎自後相迫一騎出於前太祖引弓射

前騎前騎在右回身自馬項上發矢矢著於馬腹遂逸去三騎驟至太祖馬驚幾墜右足絛於鞍復乘遂射孟格布祿馬踣地其從者秦穆布祿授以己馬挾以馳太祖率所部兵騎者三步者二十逐而擊之斬十二人獲甲六馬十八以還九月復從布寨納林布祿以九部之兵三萬人攻太祖戰於黑濟格城下九部之兵燬布寨殲焉二十五年葉赫諸部請成於太祖盟定輒背之二十六年孟格布祿所居城北溪流血二十七年秋納林布祿攻孟格布祿孟格布祿不能支以其三子質於太祖乞師太祖使費英東噶蓋以兵二千戍哈達納林布祿恐乃構明開原譯者爲書誘孟格布祿使貳於明將襲擊費英東等費英東等謂得之以告太祖九月丁未朔太祖帥師攻哈達貝勒舒爾哈齊請爲前鋒薄孟格布祿所居城兵出舒爾哈齊使告太祖曰彼城兵出矣太祖曰豈爲此城無兵而來耶躬督兵進舒爾哈齊兵塞道太祖軍循城行城上發矢多傷者遂攻城癸丑克之揚古利生得孟格布祿太祖命勿殺召入謁賜以所御貂帽豹裘置帳中旣孟格布祿與噶蓋謀爲亂事洩乃殺之二十九年春正月太祖

以女妻孟格布祿子吳爾古代明使來讓太祖遣吳爾古代還所部納林布祿歸所掠勅六十道請於明補雙貢如故事已而納林布祿復糾蒙古掠哈達哈達饑乞糴於明明不與至霫妻子奴僕以食太祖周恤之遂以吳爾古代歸哈達亡

楊吉砮葉赫部長孝慈高皇后父也其先出自蒙古姓土默特氏滅納喇部據其地遂以地爲姓後遷葉赫河岸因號葉赫其貢於明取道鎮北關地近北故明謂之北關始祖星根達爾漢生席爾克明噶圖席爾克明噶圖生齊爾噶尼正德初齊爾噶尼數盜邊斬開原市八年其子褚孔格糾他曾加哈復爲亂旋就撫授達喜木魯衛都督僉事褚孔格阻兵數反覆爲哈達部長旺濟外蘭所殺明賜勅書及所屬諸寨皆爲所奪褚孔格子太杵太杵子二長清佳砮次卽楊吉砮能撫諸部依險築二城相距可數里清佳砮居西城楊吉砮居東城皆稱貝勒明人以譯音謂之二奴是時哈達萬汗方強楊吉砮弟兄事萬謹萬納其女弟溫姐藉勢侵騷數糾建州王杲侵明邊明討王杲而清佳砮楊吉砮不

與蓋萬寶庇之既又以女妻楊吉磐然楊吉磐兄弟日夜思復先世褚孔格之仇怨萬會萬老勢衰楊吉磐復婚於哈屯恍惚太以隙復故地季勒諸寨萬子扈爾干所屬白虎赤等先後叛歸楊吉磐楊吉磐勢日盛萬遂以憂憤死死而諸子內爭其庶孽康古魯亡抵清佳磐清佳磐妻以女益間萬子孫使自相圖既而太祖兵起譬如葉赫楊吉磐顧知爲非常人謂太祖曰我有幼女俟其長當使事君太祖曰君欲結姻盟盍以年已長者妻我楊吉磐對曰我雖有長女恐未爲嘉偶幼女端重始足爲君配耳太祖遂納聘焉萬歷十一年楊吉磐弟兄率白虎赤益以煖兔恍惚太所部萬騎襲敗孟格布祿斬三百級掠甲冑一百五十益借猛骨太那木塞兵焚躡孟格布祿所部室廬田稼殆盡明分巡副使任天祚使齎布帛及鐵釜犒楊吉磐兄弟諭罷兵楊吉磐兄弟言必得勅書盡轄孟格布祿等然後已既復焚孟格布祿及其仲兄所分莊各十岱善莊一脅所屬百餘人去既又以恍惚太二千騎馳廣順關攻下沙大亮寨俘三百人挾兵邀貢勅十二年巡撫李松與總兵李成梁謀誅楊吉磐兄弟哈達亦以請

明制凡諸部互市築牆規市場謂之市圈成梁使召楊吉砮弟兄當賜勅賞資乃伏兵中固城距開原可四十里待其至已而楊吉砮弟兄挾恍惚太二千騎攢甲叩鎖北關守備崔九皋遣使讓之曰若來就撫甲騎數千何爲者楊吉砮兄弟乃請以三百騎入圈李松令參將宿振武李寧等夾城四隅爲伏戒軍中曰虜入圈聽撫則張幟按甲毋動不則鳴礮皆鼓行而前急擊之勿失松與任天祚坐南樓使九皋諭楊吉砮兄弟楊吉砮兄弟則益兵以精騎三千屯鎖北關而以三百騎入圈楊吉砮兄弟請勅書部勒孟格布祿等九皋譙讓之漸急楊吉砮兄弟瞋目語不馴李松奮髯抵几叱之九皋麾楊吉砮等下馬楊吉砮目從者白虎赤白虎赤拔刀擊九皋微中右臂九皋還擊楊吉砮從者一騎踣餘騎羣噪擊明兵軍中礮如雷伏盡起遂殺清佳砮楊吉砮白虎赤清佳砮子兀孫孛羅楊吉砮子哈兒哈麻及諸從者斬三百十有一級勒兵馳出關成梁先自中固城至圍擊葉赫軍斬千五百二十一級奪馬千七百有三遂深入楊吉砮弟兄所居寨師合圍旦日諸酋出寨門蒲伏請受孟格布祿約束刑白馬

攢刀爲誓成梁引師還自是葉赫不敢出兵窺塞擾哈達爲亂明總督張佳胤等以陳斬二奴聞成梁松天祚九皋振武寧予蔭進秩有差居數年清佳砮子布寨楊吉砮子納林布祿繼爲貝勒收餘燼謀傾哈達報世讐挾以兒鄧數侵掠闌入威遠堡納林布祿尤狂悖要貢勅如其諸父頻歲糾恍惚太攻岱善不已且因其姑溫姐煽孟格布祿康古魯圖岱善俾哈達內訌會明助岱善襲執康古魯十六年二月巡撫顧養謙決策討布寨納林布祿成梁帥師至海州雪初消人馬行淖中馬足膠不可拔成梁計擊虜利月明軍抵開原已下弦不如三月往遂壁海州養謙壁遼陽是歲河西大饑斗米錢三千菽二千發海州遼陽穀贍軍月將晦成梁自海州乘傳出三月十有三日至開原令岱善軍以白布綴肩際爲幟雞鳴發盛遠堡行三十里至葉赫屬酋落羅寨成梁使召落羅落羅駭兵至迎謁命以一幟樹寨門材官十人守之戒諸軍毋犯挾落羅及其從者三騎俱又行三十里至葉赫城下卜寨棄西城奔納林布祿併兵以拒其衆與明軍夾道馳明軍不敢先發二酋麾其騎突明軍殺三人成梁乃縱兵擊



之游擊將軍吳希漢先驅流矢集於面創甚弟希周奮起斬虜騎射希漢者亦被創明軍如牆進葉赫兵退入城守城以石爲郭郭內外重疊障以巨桁爲柵城中有山鑿山周遭爲坂絕峻爲羅城其上外以石內以木又二重中構八角樓置妻孥財貨明師攻二日破郭外柵二重城上木石雜下先登者輒死城堅不可拔成梁乃歛兵發巨礮擊城城壞穿樓斷桁葉赫兵死者無算殲其酋把當亥斬級五百五十四城中皆號泣明軍車載雲梯至直立齊其內城將置巨礮其上二酋始大懼出城乞降請與南關分勅入貢成梁令毋攻燔雲梯戒諸軍毋發其窖粟遂引師還四月朔釋康古魯遣還因進葉赫使者諭曰往若効順朝廷賞不薄江上遠夷以貂皮人參至必藉若以通若布帛米鹽農器仰給於我耕稼園獵坐收木枲松實山澤之利爲惠大矣今貢事絕江上夷道梗皆怨若我第傳檄諸部斬二酋頭來俾爲長可無煩兵誅也今貨若若何以報遂與哈達均勅永樂初賜海西諸部勅自都督至百戶凡九百九十九道至是畀哈達葉赫分領之以哈達効順使贏其一秋九月納林布祿送其女弟歸太祖

太祖率諸貝勒迎之大宴成禮是爲孝慈高皇后十九年納林布祿令宜爾當阿擺斯漢使於太祖且曰扈倫諸部與滿洲語言相通宜合五爲一今屬地爾多我寡額爾敏扎庫木二地盍以一與我太祖曰我爲滿洲爾爲扈倫各有分地我毋爾取爾毋我爭地非牛馬比豈可分遺爾等皆知政不能諫爾主奈何強顏來相瀆耶遣其使還旣而納林布祿又令尼喀里圖爾德偕哈達輝發二部使者復至太祖與之宴圖爾德起而請曰我主有傳語恐爲貝勒怒太祖問爾主何語我不爾責圖爾德曰我主言曩欲分爾地爾斬不與儻兩國舉兵相攻我能入爾境爾安能蹈我地乎太祖大怒引佩刀斷案曰爾葉赫諸舅盍嘗躬在行間馬首相交裂甲毀冑堪一劇戰耶哈達惟內訌故爾等得乘隙掩襲何視我若彼易與也吾視蹈爾地如入無人境晝卽不來夜亦可往爾其若我何因詆布寨納林布祿父見殺於明至不得收其骨奈何出大言以其語爲書遣巴克什阿林察報之布寨要至其寨不令見納林布祿遣還未幾長白山所屬朱舍里訥殷二路引葉赫兵劫太祖所屬東界洞寨二十一年夏六月扈倫

四部合兵攻太祖布寨納林布祿爲戎首却戶布察樂太祖以帥禦之遂侵哈達秋九月復益以蒙古科爾沁席北卦爾察三部朱舍里殷訥二路攻太祖謂之九姓之師太祖將出師祀於堂子祝曰我初與葉赫無釁葉赫橫來相攻糾集諸部爲暴於無辜天其鑒之又祝曰願敵盡垂首我軍奮揚人不遺鞭馬無顛覆惟天其助我是時葉赫兵萬人哈達烏喇輝發三部合兵萬人蒙古科爾沁三貝勒及席北卦爾察三部又萬人凡三萬人太祖兵少衆皆懼太祖戒勉之朝發虎崗哈達夕宿扎喀城葉赫兵方攻黑濟格城未下旦日太祖師至面城而陳使額亦都以百人先葉赫兵能攻城來戰太祖軍迎擊斬九級葉赫兵小卻布寨金台石及蒙古科爾沁三貝勒復併力合攻金台石者納林布祿弟也布寨將突陳馬觸木木路太祖部卒吳談趨而前伏其身刺殺之葉赫兵見布寨死皆痛哭陳遂亂九姓之師以此敗布寨死子布揚古嗣爲貝勒二十五年春正月扈倫諸部同遣使行成於太祖曰吾等兵敗名辱繼自今願締舊好申之以婚媾布揚古請以女弟歸太祖金台石請以女妻太祖次子台吉代善

上許之具禮以聘宰牛馬告天設卮酒塊土及肉血骨各一器四國使者誓曰  
既盟之後苟棄婚媾背盟約如此土如此骨如此血永墜厥命若始終不渝飲  
此酒食此肉福祿永昌太祖誓曰彼等踐盟則已有或渝者待三年不悛吾乃  
討之布揚古女弟高皇后姪也是時年十四未幾太祖遣將穆哈連侵蒙古獲  
馬四十納林布祿邀奪其馬執穆哈連歸於蒙古烏喇貝勒布占泰亦背盟結  
納林布祿二十七年太祖克哈達以明有責言使哈達故貝勒孟格布祿子吳  
爾古代還所部二十九年納林布祿以兵侵之太祖遂以吳爾古代歸三十一  
年秋九月高皇后疾篤思見母太祖使迎焉納林布祿不許令其僕南太來視  
疾太祖數之曰汝葉赫諸舅無故掠我戶布察寨又合九姓之師而來攻我既  
乃自服其辜歃血誓天爲盟誓而又背之許我國之女皆嫁蒙古今我國妃病  
篤欲與母訣而又不許是終絕我也既而高皇后崩三十二年春正月太祖帥  
師攻葉赫克二城曰張曰阿氣蘭取七寨俘二千餘人而還三十五年納林布  
祿聞輝發貝勒拜音達里使貳於太祖太祖以是取輝發納林布祿不能救而

布揚古女弟受太祖聘十六年不遣年三十烏喇貝勒布占泰將強委禽焉四十年太祖討布占泰四十一年師再舉遂克烏喇布占泰亡奔葉赫布揚古欲遂以女弟嫁之布占泰遜謝不敢娶爲別婚是時納林布祿已死其弟金台石嗣爲貝勒與布揚古分居東西城如故秋九月太祖使告葉赫執布占泰以獻使三往不聽太祖謀伐之先期遣第七子巴布泰率所屬阿都干骨里等三十餘人質於明至廣寧謁巡撫都御史張濬請收葉赫遣布占泰濬以聞神宗下部議以爲質子眞僞莫可辨拒勿納太祖乃以四萬人會蒙古喀爾喀貝勒介賽伐葉赫會有通卒洩師期葉赫收張吉當阿二路民保太祖圍兀蘇城城長談扈石木降太祖飲以金卮賜冠服遂略張吉當阿呀哈黑兒蘇何敦克布齊寶俄吉岱七城下十九寨盡焚其廬舍儲峙以兀蘇城降民三百戶還葉赫愬於明以兵援遇介賽戰勝遂遣使讓太祖令游擊馬時稱周大岐率兵千挾火器戍葉赫太祖至撫順投書游擊李永芳申言侵葉赫以葉赫背盟女已字悔不遣又匿布占泰故與明無怨何遽欲相侵遂引師還金台石有女育於其兄

納林布祿嫁介賽金台石既爲貝勒殺納林布祿妻介賽假辭爲外姑復仇覬  
得布揚古女弟以解布揚古女弟誓死不願行介賽治兵攻葉赫旣而喀爾喀  
貝勒巴哈達爾漢爲其子莽古爾代請婚布揚古將許之明邊吏諭布揚古姑  
留此女毋使太祖及介賽望絕冀相羈縻而以兵分屯開原撫順及鎮北堡爲  
犄角衛葉赫四十三年夏五月布揚古遂以其女弟許莽古爾代秋七月婚焉  
太祖聞諸貝勒皆怒請討葉赫不許請侵明又不許且曰此女生不祥哈達輝  
發烏喇三部以此女構怨相繼覆亡今明助葉赫不與我而與蒙古殆天欲亡  
葉赫以激其怒也我知此女流禍將盡死不遠矣布揚古女弟嫁介賽未一年  
而死死時年蓋三十四明所謂北關老女者也是歲爲太祖天命元年太祖旣  
稱帝建國始用兵於明三年取撫順清河明經略侍郎楊鎬使諭葉赫發兵撓  
太祖秋九月金台石子德爾格勒侵太祖克一寨俘四百七人斬八十四級明  
賜以白金二千兩綵緞表裏二十四年春正月太祖謀報之使大貝勒代善以  
兵五千戍札喀關阻明師而躬督兵伐葉赫辛卯入其境經克亦特城粘罕寨

至葉赫城東十里克大小屯寨二十餘葉赫乞援於明明開原總兵馬林以師至合城兵而出見太祖兵盛不敢擊太祖亦引還二月楊鎬大舉伐太祖使都司寶永澄徵兵於葉赫葉赫以二千人應至三岔北明師覆永澄死之太祖謀使所屬詐降於金台石金台石不應六月太祖攻開原葉赫復以二千人援至則開原已下秋八月經略侍郎熊廷弼初視事葉赫使期復開原廷弼厚賚之太祖甚葉赫八月大舉伐之己巳師出聲言向瀋陽以綴明師壬申至葉赫城下太祖攻金台石東城而命諸貝勒馳向西城取布揚古布揚古與其弟布爾杭古以城兵出西郭陟岡鳴角而噪望太祖軍盛歛兵入諸貝勒遂督軍合圍太祖圍東城入其郭布攻具呼金台石降不聽曰吾非明兵比等丈夫也肯束手降乎甯戰而死耳太祖麾兵攻城兩軍矢交發太祖軍擁楯陟山麓將穴城城上下木石擲火器太祖軍冒進穴城城圯師入城兵迎戰敗潰皆散走太祖使執幟約軍士毋妄殺執黃蓋令降者免死城民皆請降金台石以其孥登臺太祖軍就圍之命之下金台石求見四貝勒盟而後下四貝勒爲太宗高皇后

所出金台石甥也四貝勒方攻西城太祖召之至使見金台石金台石曰我未嘗見我甥眞僞烏能辨費英東達爾哈在側曰汝視常人中有奇偉如四貝勒者乎且曩與汝通好時嘗以媼往乳汝子德爾格勒盍使媼辨之金台石曰何用媼爲也觀汝輩辭色特誘我下殺我耳我石城鐵門旣爲汝破縱再戰安能勝特我祖父世分土於斯我生於斯長於斯則死於斯可已四貝勒勸之力金台石使阿爾塔石先見太祖太祖復令諭降金台石又求見其子德爾格勒德爾格勒至金台石終不下四貝勒將縛德爾格勒德爾格勒曰我年三十六乃今日死耶殺可也何縛焉四貝勒以德爾格勒見太祖太祖撤所食食之命四貝勒與共食且曰爾兄也善遇之金台石妻將其幼子下金台石引弓其從者復甲太祖軍進毀臺金台石縱火屋宇皆燼太祖諸將謂金台石且死軍退火燼金台石潛下爲太祖軍所獲縊殺之諸貝勒圍西城布揚古聞東城破與布爾杭古使請降並請盟無死大貝勒曰汝輩畏死盍以汝母先汝母我外姑也我寧能殺之布揚古母至軍大貝勒以刀割酒誓飲其半使送布揚古布爾杭



古飲其半乃降大貝勒以布揚古見太祖布揚古行復勒馬大貝勒挽其轡命母沮見太祖布揚古以一膝跪不拜而起太祖取金卮授之布揚古復以一膝跪酒不竟飲不拜而起太祖命大貝勒引去以其慙也卽夕亦縊殺之賫布爾杭古攻殺明游擊馬時柄戍兵殲焉楊鎬聞警使總兵李如楨自撫順出張疑兵爲葉赫聲援得十餘級而退神宗命給事中姚宗文行邊求葉赫子孫德爾格勒有女子子二嫁蒙古各賜白金二千明臣請爲金台石布揚古立廟又以哈達餘裔王世忠爲金台石妻姪授游擊將以風諸部然葉赫遂亡太祖以德爾格勒歸旗制定隸滿洲正黃旗授三等副將太宗天聰三年改三等梅勒章京卒八年子南楮嗣十年察哈爾林丹汗列所部內亂太宗遣貝勒多爾袞帥師略地林丹汗福金號蘇泰太后南楮女兄也因使南楮諭降南楮至其帳呼其人出語之曰爾福金蘇泰太后之弟南楮至矣其人入告蘇泰太后大驚使故葉赫部來媵者視之信蘇泰太后號而出與南楮相抱持遂使其子額哲出降南楮旋以罪奪爵復以南楮弟索爾和嗣乾隆初改二等男布爾杭古分

隸正紅旗亦授三等副將再傳坐事奪世職

布占泰烏喇部長太祖婿也烏喇亦扈倫四部之一與哈達同祖納齊卜祿納齊卜祿五傳至克什納古對朱顏兄弟克什納之後爲哈達部古對朱顏生太蘭太蘭生布顏布顏收附近諸部築城洪尼濱烏喇河因號烏喇爲貝勒布顏子二布干博克多布顏死布干嗣爲部長布干子二滿泰布占泰布干死滿泰嗣爲部長萬曆二十一年夏六月葉赫糾扈倫諸部侵太祖滿泰以所部從秋九月葉赫再糾扈倫諸部及蒙古科爾沁所部及滿洲長白山所屬大舉分道侵太祖滿泰使布占泰以所部從與哈達貝勒孟格布祿輝發貝勒拜音達里合軍萬人戰敗葉赫貝勒布寨死於陣科爾沁貝勒明安單騎走戰之明日卒有得布占泰者縛以見太祖曰我獲俘將殺之俘大呼勿殺願自贖因縛以來見蹠太祖前太祖問誰何對曰烏喇貝勒滿泰弟布占泰也生死惟貝勒命叩首不已太祖曰汝輩合九部兵爲暴於無辜天實厭之昨陣斬布寨彼時獲汝汝死決矣今見汝何忍殺語有之曰生人勝殺人與人勝取人遂解其縛與以

給喇孫裘撫育之居三年二十四年秋七月遣還所部使圖爾坤黃占博爾焜蜚揚古護行未至滿泰及其子淫於所部皆見殺布占泰至滿泰有叔興尼牙將殺而奪其地二使者嚴護之興尼牙謀不行乃出奔葉赫卒定布占泰而還冬十二月布占泰以女弟妻貝勒舒爾哈齊二十五年春正月與葉赫諸部同遣使請盟盟甫罷布占泰旋執太祖所屬瓦爾喀部安褚拉庫內河二路頭人爲衆所推者羅屯噶哈石屯汪吉磐三人送葉赫使招所部貳於太祖又以滿泰妻都都祜所寶銅錘畀納林布祿二十六年春正月太祖命台吉褚英等伐安褚拉庫路冬十二月布占泰來謁以三百人俱太祖以舒爾哈齊女妻之賜甲冑五十敕書十道禮而遣之二十九年冬十一月乙未朔布占泰以其兄滿泰女歸太祖布占泰初聘布寨女旣又聘明安女以鎧冑貂捨喇孫裘金銀駝馬爲聘明安受之而不予女三十一年春正月布占泰使告太祖曰我昔被擒待以不死俾我主烏喇又妻我以公主恩我甚深我孤恩嘗聘葉赫蒙古女未敢以告今蒙古受聘而復悔我甚恥之乞再降以女當歲歲從兩公主來朝太

祖允其請又以舒爾哈齊女妻焉三十五年春正月東海瓦爾喀部蜚悠城長策穆特黑謁太祖自陳屬烏拉爲布占泰所虐乞移家來附太祖命貝勒舒爾哈齊褚英代善率諸將費英東扈爾漢揚古利等以兵三千至蜚悠城收環城屯寨五百戶分兵三百授扈爾漢揚古利護之先行布占泰使其叔博克多將萬人要諸途日暮扈爾漢依山結寨以相持翼日烏喇兵來攻揚古利率兵擊敗之烏喇兵引退渡河陟山爲固褚英代善等率後軍至緣山奮擊烏拉兵大敗代善陣斬博克多是日晝晦雪甚寒烏拉兵死者甚衆俘其將常住胡里布等斬三千級獲馬五千甲三千以還三十六年春正月太祖復命褚英及台吉阿敏將五千人伐烏拉克宜罕阿麟城斬千人獲甲三百俘其餘衆布占泰糾蒙古科爾沁貝勒益阿代出合軍屯所居城外二十里畏褚英等軍強不敢進引還秋九月遣使復請修好太祖使報問布占泰執納林布祿所部種人五十輩畀太祖使者盡殺之又遣使來請曰我數背盟獲罪於君父若更以女子子妻我撫我如子我永賴以生矣太祖復允其請又以女子子妻之四十年布占

秦復背盟秋九月侵太祖所屬虎爾哈路復欲娶太祖所聘葉赫貝勒布寨女又以鳴鏑射所娶太祖女太祖聞之怒癸丑親率兵伐之庚申兵臨烏喇河布占泰以所部迎戰夾河見太祖軍甲冑甚具士馬盛強烏喇兵人人惴恐不敢渡太祖循河行下河濱屬城五又取金州城遂駐軍焉冬十二月辛酉朔太祖以太牢告天祭纛青白氣見東方指烏喇城北太祖屯其地三日盡焚其儲峙布占泰晝引兵出城暮入城休太祖率兵毀所下六城廬舍糗糧皆燼移軍駐伏爾哈河渡口布占泰使使者三輩以舟出見太祖布占泰率其弟喀爾喀瑪及所部拉布泰等繼以舟出跪舟中而言曰烏喇國即父國也幸毋盡焚我廬舍糗糧叩首請甚哀太祖立馬河中數其罪布占泰對曰此特讎者離間使我父子不睦我今在舟中若果有此惟天惟河神其共鑒之拉布泰自旁僂曰貝勒既以此怒曷不以使者來詰太祖責之曰我部下豈少汝輩人耶事實矣又何詰河冰無時我兵來亦無時汝口雖利能齒我刃乎布占泰大懼止拉布泰毋言喀爾喀瑪爲乞宥太祖乃命質其子及所部大酋子遂還營五日引還度

烏喇河濱邑麻虎山巔以木爲城留千人戍焉十二月有白氣起烏喇經太祖所居南屬虎欄哈達山布占泰旋復背盟幽太祖及舒爾哈齊女將以其女薩哈廉子綽啓龍及所部大曾子十七人質於葉赫娶太祖所聘貝勒布寨女四十年春正月太祖聞復率兵伐之布占泰期以是月丙子送其子出質而太祖軍以乙亥至攻下孫扎泰及郭多俄謨三城丙子布占泰以兵三萬起伏爾哈城而軍太祖猶欲諭之降諸貝勒代善阿敏諸將費英東何和里扈爾漢額亦都安費揚古皆請戰曰我利速戰但慮彼不出耳今旣出平原廣野可一鼓禽也舍此不戰利兵秣馬何爲乎來且使布占泰娶葉赫女辱莫甚焉雖後討之何益太祖曰我荷天寵自少在兵間遇勁敵無不單騎突陳者今日何難率汝輩身先搏戰但慮諸貝勒諸將或一二夷傷我所深惜故欲出萬全非有所懼也今汝輩志一卽可決戰因命被甲諸貝勒諸將則大懼一軍盡甲令曰勝卽奪門毋使復入乃率兵進布占泰自伏爾哈城率兵還令其軍皆步爲陳兩軍距百步太祖軍亦皆舍馬步戰矢交如雨呼聲震天太祖躬入陳諸貝勒諸

將從之縱擊烏拉兵大敗死者十六七師入太祖坐西門樓命樹幟布占泰餘兵不滿百還至城下見幟則大奔遇代善布占泰兵皆潰僅以身免奔葉赫太祖使請於葉赫葉赫不聽後七年太祖克葉赫布占泰蓋已前死

拜音達里輝發部長也輝發亦扈倫四部之一其先姓益克得里氏居黑龍江岸尼馬察部有昂古里星古力者自黑龍江載木主遷於渣魯居焉時扈倫部噶揚噶圖墨士二人居張城二人者姓納喇氏昂古里星古力因附其族宰七牛祭天改姓納喇是爲輝發始祖昂古里星古力子二留臣備臣備臣子二納領噶耐寬納領噶生拉哈都督拉哈都督生噶哈禪都督噶哈禪都督生齊訥根達爾漢齊訥根達爾漢生王機褚王機褚收鄰近諸部度輝發河濱扈爾奇山築城以居因號輝發城負險堅峻蒙古察哈爾部扎薩克圖土門汗嘗自將攻之不能克王機褚死時其長子前死孫拜音達里殺其叔七人自立爲貝勒萬歷二十一年夏六月葉赫糾哈達烏喇諸部侵太祖拜音達里以所部從秋九月復舉兵拜音達里與哈達貝勒孟格布祿烏喇貝勒布占泰合兵萬人兵

敗還二十三年夏六月太祖攻輝發取所屬多壁城輝發將克充格蘇猛格二人成殲焉二十五年春正月與葉赫諸部同遣使行成於太祖居數年拜音達里之族有叛附葉赫者部衆有携心拜音達里懼以所屬七人之子質於太祖太祖發兵千人助之鎮撫葉赫貝勒納林布祿使告拜音達里曰爾以質子歸我亦歸爾叛族拜音達里信之乃曰吾其中立於滿洲葉赫二國之間乎遂取質子還以其子質於納林布祿納林布祿殊無意歸叛族拜音達里以告太祖且曰吾前者爲納林布祿所誑怙舊恩敢請婚太祖許之旣而拜音達里背約不娶太祖使詰之曰汝昔助葉赫再舉兵侵我我旣宥爾罪復許爾婚今背約不娶何也拜音達里詭對曰吾子質葉赫須其歸娶爾女與爾合謀因築城三重自固及其子自葉赫歸太祖復遣使問拜音達里倚城堅度兵卽至足以守遂負盟三十五年秋九月丙申長星出東方指輝發八夕乃滅乙亥太祖率師討之甲辰合圍遂克之殺拜音達里及其子安集其民帥師還輝發亡

論曰扈倫四部哈達最強葉赫稍後起與相埒烏喇輝發差弱其通於明皆以



所領衛令於所部則曰國太祖漸強盛四部合攻之兵敗縱散以次覆滅太祖  
與四部皆有連奪其地殲其酋顯庸其族裔疆場之事不以婚媾道有時乃藉  
口以啓戎自古則然不足異也

清史稿

列傳十一

張煌言

張名振

字明卿

鄭成功

字伯璠

閩子夏

李定國

張煌言字玄箸浙江鄞縣人明崇禎十五年舉人時以兵事急令兼試射煌言三發皆中慷慨好論兵事順治二年師定江寧煌言與里人錢肅樂沈宸荃馮元颺等合謀奉魯王以海煌言迎於天台授行人至紹興稱監國授翰林院修撰入典制誥出領軍旅三年師潰歸與父母妻子決從王次石浦與黃斌卿軍相犄角加右僉都御史魯王諸將張名振最強四年江南提督吳勝兆請降煌言勸名振援勝兆遂監其軍以行至崇明颺作舟覆煌言被執七日有導之出者走間道復還入海經黃巖追者圍而射之以數騎突出自是登習騎射集義旅屯上虞平岡諸山寨多出劫掠獨煌言與王翊屢勸輸載所部母擾民六年覲王於健跳七年名振奉王居舟山召煌言入衛乃以平岡兵授劉翼明陳天樞率親軍赴之加兵部侍郎八年聞父訃浙江提督田雄書招降卻之師攻

滌洲名振奉王侵吳淞冀相牽制俄師破舟山乃奉王入金門依鄭成功成功用唐王隆武號事魯王但月上豚米修寓公之敬煌言嘗謂成功曰招討始終爲唐眞純臣也成功亦曰侍郎始終爲魯與吾豈異趨哉故與成功所事不同而其交能固王亦賴以安居九年監名振軍經舟山至崇明進次金山十年復至崇明師與戰敗績十一年又自吳淞入江逼鎮江登金山望祭明太祖陵烽火達江寧俄退次崇明再入江略瓜洲儀眞薄燕子磯尋還屯臨門皆與名振俱十二年成功遣其將陳六御與名振取舟山台州守將馬信約降煌言以沙船五百迎之名振中毒卒遺言以所部屬煌言十三年師再破舟山煌言移軍秦川王去監國號通表桂王十四年桂王使至授煌言兵部侍郎翰林院學士兩江總督鄧廷佐書招煌言煌言以書報略曰來書揣摩利鈍指畫興衰庸夫聽之或爲變色貞士則不然所爭者天經地義所圖者國恤家仇所期待者豪傑事功聖賢學問故每氈雪自甘膽薪深厲而卒以成事僕於將略原非所長祇以讀書知大義左袒一呼甲盾山立濟則賴君靈不濟則全臣節憑陵風濤

縱橫鋒鏑今踰一紀矣豈復以浮詞曲說動其心哉來書溫慎故報數行若斬使焚書適足見吾意之不廣亦所不爲也十五年與成功會師將入江次羊山遇颺引還十六年成功復大舉煌言與俱次崇明煌言曰崇明江海門戶宜先定營於此庶進退有所據成功不從師防江金焦兩山間橫鐵索隔江置大炮煌言以十七舟襲江而渡成功破瓜洲欲取鎮江慮江岸援至煌言曰舟師先擣觀音門南京自不暇出援成功以屬煌言煌言所將人不及萬舟不滿百卽率以西降儀真進次六合聞成功拔鎮江煌言致書言當先撫定夾江郡縣以陸師趨南京成功復不從煌言進薄觀音門遣別將以輕舟數十直上攻蕪湖分兵掠江浦成功水師至會蕪湖已降趨煌言往撫部勒諸軍分道略地移檄諸郡縣於是太平寧國池州徽州廣德及諸屬縣皆請降得府四州三縣二十四煌言所過秋毫無犯經郡縣入謁孔子廟坐明倫堂進長吏考察黜陟略如巡按行部故事遠近響應方如徽州受降聞成功敗還蕪湖收兵冀聯合瓜洲鎮江軍爲守計旣聞成功併棄瓜洲鎮江入海煌言兵遂潰兩江總督卽廷佐

發舟師斷煌言東下道書招煌言煌言拒不應率餘兵道繁昌謀入鄱陽湖次銅陵師自湖廣至煌言與戰而敗撫殘兵僅數百退次無爲焚舟登陸自銅城道霍山英山度東溪嶺追騎至從者盡散煌言突圍出變服夜行至高潁埠有父老識之匿於家數日導使出間道渡江走建德祁門亂山間店作力疾行至休甯得舟下嚴州復山行經東陽義烏至天台達海收集舊部成功分兵登之屯長亭鄉築塘捍潮闢田以贍軍使桂王告敗桂王敕慰問加兵部尙書十七年移軍臨門十八年廷議徙海上居民絕接濟煌言無所得饒開屯南田自給成功攻臺灣煌言移書阻之不聽師下雲南取桂王煌言遣其客羅綸入臺灣趣成功出兵成功以臺灣方定不能行遣使入鄖陽山中說十三家兵使之擾湖廣以緩雲南之師十三家者郝永忠劉體純輩故李自成部將竄據茅麓山衰疲不敢出康熙元年煌言復移軍沙堤成功自攻江寧敗還取臺灣謀建國魯王在金門禮數日薄煌言歲時供億又慮成功疑十年不敢入謁及聞桂王敗亡上啓魯王將奉以號召俄成功卒煌言還軍臨門又有讓奉魯王監國者

煌言使勸錦以李亞子錦囊三矢相勗浙江總督趙廷臣復招煌言煌言書謝之煌言孤軍勢日促或議入雞籠島煌言不可二年魯王殂煌言慟曰孤臣栖栖海上與部曲相依不去者以吾主尙存也今更何望三年遂散遣其軍居懸澳懸澳在海中荒瘠無人烟南汊港通舟北倚山人不能上煌言結茅而處從者綸及部曲數人一侍者一舟子而已廷臣與提督張杰謀致煌言得煌言故部曲使爲僧普陀伺煌言知蹤跡夜半引兵攀嶺入執煌言及綸與部曲葉金王發侍者湯冠玉煌言至杭州廷臣賓禮之九月乙未死於弼教坊舉目望吳山歎曰好山色賦絕命詞坐而受刃綸等並死煌言妻董子萬祺先被執羈管杭州先煌言死綸字子木丹徒諸生方成功敗還綸入謁勸以還帆復取南都成功不能用乃從煌言又有山陰葉振名字介紹嘗謁煌言論兵事煌言薦授翰林院修撰兵科給事中既復上策欲擒斬成功奪其兵圖興復煌言死登越王嶺遙祭爲文六千五百餘言與綸稱張司馬二客乾隆四十一年高宗命錄勝朝殉節諸臣得專設者二十六通諡忠烈百十三煌言與焉忠節百八烈愍

五百七十六節愍八百四十三祀忠義祠職官四百九十五士民千七百二十八諸與煌言並起者錢肅樂沈宸荃馮元鵬明史並有傳張名振字侯服應天江寧人崇禎末爲石浦游擊魯王次長垣率舟師赴之封定西侯以所部屯舟山移南田迎王居健跳所與阮進王朝先共擊黃斌卿斌卿莆田人崇禎末爲舟山參將唐王時封伯名振奉魯王如舟山不納既以王命進侯斌卿法嚴急配民爲兵籍大戶田爲官田先後戕剽本澈賀君堯王次健跳令進告羅又不應至是名振破舟山沈斌卿於海迎王居焉使日本乞師不應成功襲破鄭彩名振因聲彩殺熊汝霖鄭遵謙罪擊破其餘兵俄又襲殺朝先師攻舟山名振與煌言奉王南依成功成功居王金門名振屯崑頭成功初見名振不爲禮名振袒背示之渥赤心報國四字深入膚乃與二萬人共謀復南京攻崇明破鎮江題詩金山而還復與成功偕出師次羊山颺作舟多損惟名振部獨完再攻崇明復入鎮江觀兵儀真侵吳淞戰屢勝順治十二年十二月卒於軍或云成功酖之王翊宇完助浙江餘姚人順治四年起兵下管奉魯王破上虞是時肅

山會稽台州奉化民兵並起結山寨無所得饒則不免剽掠翊與煥言皆履畝科稅贍兵陳天樞者會稽山寨將也薦劉翼明佐翊武勇善戰東徇奉化師與遇引邵魯王授翊官累進至兵部尙書復陷新昌越餘姚拔潞山固山額真金礦浙江提督田雄合兵攻大嵐山八年七月翊走還山團練執以獻死定海天樞與翼明攻陷新昌視火藥驟焚急投水月餘死翼明善大刀治兵戒毋犯民朔敗死於家肅樂宸荃諡忠節翊諡烈愍斌卿設節愍名振不與其弟名揚死舟山設烈愍

鄭成功初名森字大木福建南安人父芝龍明季入海從顏思齊爲盜思齊死代領其衆崇禎初因巡撫熊文燦請降授游擊將軍以捕海盜劉香李魁奇攻紅毛功累擢總兵芝龍有弟三芝虎鴻遠芝豹芝虎與劉香搏戰死鴻遠初以武舉從軍用芝龍功授錦衣衛掌印千戶崇禎十四年成武進士明制勳衛舉甲科進三秩授都指揮使累遷亦至總兵福王立南京皆封伯命鴻遠守瓜洲順治二年師下江南鴻遠兵敗奉唐王聿鍵入福建與芝龍共擁立之皆進侯



封芝豹伯未幾又進芝龍平國公鴻遠定國公芝龍嘗娶日本婦是生森入南安學爲諸生芝龍引謁唐王唐王寵異之賜姓朱爲更名尋封忠孝伯唐王倚芝龍兄弟擁重兵芝龍族人彩亦封伯築壇拜彩鴻遠爲將分道出師遠延不卽行招撫大學士洪承疇與芝龍同縣通書問敘鄉里芝龍挾二心三年貝勒博洛師自浙江下福建芝龍撤仙霞關守兵不爲備唐王坐是敗博洛師次泉州書招芝龍芝龍率所部降成功諫不聽芝龍欲以成功見博洛鴻遠陰縱之入海四年博洛師還以芝龍歸京師隸漢軍正黃旗授三等精奇尼哈番成功謀舉兵兵寡如南澳募兵得數千人會將吏盟仍用唐王隆武號自稱招討大將軍以洪政陳輝楊才張正余寬郭新分將所部兵移軍鼓浪嶼成功年少有文武略拔出諸父兄中近遠皆屬目而彩奉魯王以海自中左所改次長垣進建國公屯廈門彩弟聯魯王封爲侯據浯嶼相與爲犄角成功與彩合兵攻海澄師赴援洪政戰死成功又與鴻遠合兵圍泉州師赴援圍解鴻遠入揭陽成功頒明年隆武四年大統歷五年成功陷同安進犯泉州總督陳錦師至克同

安成功引兵退六年成功遣其將施琅等陷漳浦下雲霄鎮進次詔安明桂王稱帝號肇慶至是已三年成功遣所署光祿卿陳士京朝桂王始改用永歷號桂王使封成功延平公魯王次舟山彩與魯王貳殺魯王大學士熊汝霖及其將鄭遵謙七年成功攻潮州總兵王邦俊禦戰成功敗走攻碣石寨不克施琅出降成功襲廈門擊殺聯奪其軍彩出駐沙埕魯王將張名振討殺汝霖遵謙罪擊彩引餘兵走南海居數年成功招之還居廈門卒八年桂王詔成功援廣州引師南次平海使其族叔芝莞守廈門福建巡撫張學聖遣泉州總兵馬得功乘虛入焉盡擣其家貲以去成功還斬芝莞引兵入漳州提督楊名高赴援戰於小盈嶺名高敗績進陷漳浦總督陳錦克舟山名振進奉魯王南奔成功使迎居金門九年陷海澄錦赴援戰於江東橋錦敗績左次泉州成功復取詔安南靖平和遂圍漳州錦師次鳳凰山爲其奴所殺以其首奔成功漳州圍八閱月固山額真金礦等自浙江來援與名高兵合自長泰間道至漳州擊破成功成功入海澄城守金礦等師薄城成功將王秀奇郝文興督兵力禦不能

克上命芝龍書諭成功及鴻逵降許赦罪授官成功陽諾詔金福等率師還浙江十年封芝龍同安侯而使肅敕封成功海澄公鴻逵奉化伯授芝豹左都督芝龍慮成功不受命別爲書使鴻逵諭意使至成功不受命爲書報芝龍芝豹奉其母詣京師成功復出掠福建興化諸屬縣十一年上再遣使諭成功授靖海將軍命率所部分屯漳潮惠泉四府成功初無意受撫乃改中左所爲思明州設六官理事分所部爲七十二鎮遷奉桂王承制封拜月上魯王豚米並厚廩漚溪寧靖諸王禮待諸遺臣王忠孝沈佺期郭貞一盧若騰華若薦徐孚遠等置儲賢館以養士名振進率所部攻崇明謀深入成功嫉之以方有和議召使還名振俄遇毒死成功託科餉四出劫掠蔓及上游福建巡撫佟國器疏聞上密敕爲備李定國攻廣東急使成功趨會師成功遣其將林察周瑞率師赴之遷延不即進定國敗走成功又攻漳州千總劉國軒以城獻再進復陷同安其將甘輝陷仙游穴城入殺掠殆盡至是和議絕上命鄭親王世子濟度爲定遠大將軍率師討成功十二年左都御史張鼎華請誅芝龍國器亦發芝龍與

成功私書乃奪芝龍爵下獄成功遣其將洪旭陳六御攻陷舟山進取溫台聞濟度師且至墮安平鎮及漳州惠安南安同安諸城撤兵衆思明濟度次泉州檄招降不納易爲書成功依違答之上又令芝龍自獄中以書招成功謂不降且族誅成功終不應十三年濟度以水師攻廈門成功遣其將林順陳澤拒戰颺起師引還成功以軍儲置海澄使王秀奇與黃梧蘇明同守梧先與明兄茂攻揭陽未克成功殺茂並責梧梧明並怨成功俟秀奇出以海澄降濟度詔封梧海澄公駐漳州盡發鄭氏墓斬成功所置官大將軍伊爾德克舟山擊殺六御成功攻陷閩安城牛心塔使陳斌成焉十四年鴻遠卒帥克閩安斌降而殺之成功陷台州十五年謀大舉深入與其將甘輝余新等率水師號十萬陷樂清遂破溫州張煌言來會將入江次羊山遇颺舟敗退泊舟山桂王使進封爲王成功辭仍稱招討大將軍十六年五月成功率輝新等整軍復出次崇明煌言來會取瓜洲攻鎮江使煌言前驅泝江上提督管效忠師赴援戰未合成功將周全斌以所部陷陳大兩騎陷淖成功兵徒跣擊刺往來黜疾效忠師敗績

成功入鎮江將以違令斬全斌繼而釋之使守焉進攻江寧煌言次蕪湖廬鳳  
寧徽池太諸府縣多與通款騰書成功謂宜收旁郡縣以陸師急攻南京成功  
徂屢勝方謁明太祖陵會將吏置酒輝諫不聽崇明總兵梁化鳳赴援江寧總  
管喀喀木等合滿漢兵出戰襲破新軍諸軍皆奔潰遂大收生得輝殺之成功  
收餘衆猶數萬棄瓜洲鎮江出海欲取崇明江蘇巡撫蔣國柱遣兵赴援化鳳  
亦還師禦之成功戰復敗引還煌言自問道走免上遣將軍達素閩浙總督李  
率泰分兵出漳州同安規取廈門成功使陳鵬守高崎族兄泰出浯嶼而與周  
全斌陳輝黃庭次海門師自漳州薄海門戰成功將周瑞陳堯策死之迫取輝  
舟輝焚舟戰方急風起成功督巨艦衝入泰亦自浯嶼引舟合擊師大敗有滿  
洲兵二百降夜沈之海師自同安檣高崎鵬約降其部將陳蟒奮戰師以鵬已  
降不備亦敗成功收鵬殺之引還十七年命靖南王耿繼茂移鎮福建又以羅  
託爲安南將軍討成功十八年用黃梧議徙濱海居民入內地增兵守邊成功  
自江南敗還知進取不易桂王入緬甸聲援絕勢日蹙乃規取臺灣臺灣福建

海中島荷蘭紅毛人居之芝龍與顏思齊爲盜時嘗屯於此荷蘭築城二曰赤嵌曰王城其海口曰鹿耳門荷蘭人恃鹿耳門水淺不可渡不爲備成功師至水驟長丈餘舟大小銜尾徑進紅毛人棄赤嵌走保王城成功使謂之曰土地我故有當還我珍寶忒爾載歸國七閱月紅毛存者僅百數十城下皆遣歸國成功乃號臺灣爲東都示將迎桂王狩焉以陳永華爲謀主制法律定職官興學校臺灣周千里土地饒沃招漳泉惠潮四府民闢草萊興屯聚令諸將移家實之水土惡皆憚行又以令嚴不敢請銅山守將郭義蔡祿入漳州降是歲聖祖卽位戮芝龍及諸子世恩世蔭世默成功旣得臺灣其將陳豹駐南澳而令子錦居守思明康熙元年成功聽周全斌讒遣擊豹豹舉軍入廣州降惡錦與乳媼通生子遣泰就殺錦及其母董會有訛言成功將盡殺諸將留廈門者值全斌自南澳還執而囚之擁錦用芝龍初封稱平國公舉兵拒命成功方病聞之狂怒囑指五月朔尙據胡牀受諸將謁數日遽卒年三十九成功子十錦其長也一名經成功旣卒臺灣諸將奉其幼弟世襲爲招討大將軍使於錦告喪

錦出全斌使爲將以永華爲咨議馮錫範爲侍衛引兵至臺灣諸將有欲拒錦立世襲者全斌力戰破之錦乃入嗣爲延平王世襲走泉州降二年錦還思明泰嘗與臺灣諸將通書錦得之遂殺泰泰弟鳴駿廣子續緒亦走泉州降詔封鳴駿遵義侯續緒慕恩伯世襲廣皆授左都督諸將蔡鳴雷陳輝楊富何義先後舉軍降錦漸弱耿繼茂李率泰大發兵規取金廈出同安馬得功將降卒並徵紅毛兵出泉州黃梧施琅出海澄錦令全斌當得功遇於金門外烏沙得功舟三百紅毛夾板船十四全斌以二十舟入陳衝擊紅毛礮皆不中諸舟披靡得功戰死而同安海澄二道兵大勝直破廈門琅復進克金門浯嶼錦退保銅山三年錦將杜輝以南澳降銅山糧垂盡全斌亦出降封承恩伯錦與其將黃廷堅守繼茂等復以水師出八尺門廷與諸將翁求多等以三萬人降遂拔銅山焚之得仗艦無算錦與永華及洪旭引餘衆載其孥盡入臺灣改東都爲東甯國置天興萬年二州仍以永華綜國政詔授施琅靖海將軍周全斌楊富爲副督水師攻臺灣阻颺不得進四年廷議罷兵李率泰請遣知府慕天顏諭降

假卿銜齎敕往錦請稱臣入貢如朝鮮上未之許六年徵琅入京師撤降兵分屯諸省戢戍守界不復以臺灣爲意錦兵亦不出相安者數年濱海居民漸復業十二月耿精忠將以福建叛應吳三桂使約錦爲援十三年精忠遂反錦仍稱永歷年號以永華輔長子克塽居守與諸將馮錫範等督諸軍渡海而西入思明取同安錦以族人省英知思明省英芝莞子也集舟航整部伍方引軍復出而精忠與爭泉州泉州兵內亂精忠所遣守將潰圍走迎錦師入復攻下漳州精忠遣兵圍潮州潮州總兵劉進忠降於錦錦遣其將趙得勝入潮州擊破精忠兵錦更定軍制以錫範及參軍陳繩武贊畫諸政諸將劉國軒薛進思何祐許輝施福艾禎祥分領各軍省英爲宣慰使督各郡錢糧令人月輸銀五分曰毛丁船計丈尺輸稅曰樅頭鹽司分莞鹽場鹽石值二錢徵餉四錢餉司科雜稅給軍復開互市英圭黎暹羅安南諸國市舶並至思明井里烟火幾如承平時十四年精忠使賀年錦亦報禮自是復相結永春民呂花保所居村曰馬跳不應徵索使進思圍之三月不下誘花降而殺之續順公沈瑞屯饒平進忠



攻之何祐擊破援兵遂執瑞及其孥歸於臺灣海澄公黃梧卒子芳度保漳州  
錦自海澄移軍萬松關祐亦自潮州攻平和降守將賴陞芳度孤守漳州圍合  
總兵吳淑以城降芳度死之其孥皆殉十五年康親王傑書下福建精忠降克  
泉州國軒復圍之兩月不下李光地迎師自間道赴援總兵林賢黃鎮林子威  
以舟師會國軒退次長泰墮同安稍進屯漳州溪西師進擊國軒國軒敗棄長  
泰走錦將許輝以二萬人攻福州壁烏龍江康親王遣副都統喇哈達等渡江  
奮擊破其壘逐北四十里興泉汀漳諸郡盡復惟海澄未下十六年師克海澄  
錦復破之遂圍泉州錦下教叙國軒淑祐等功副都統穆赫林等克泰寧建寧  
寧化長汀清流歸化連城上杭武平永定凡十縣喇哈達等解泉州圍錦撤兵  
還思明十七年康親王遣知府張仲舉招錦不納國軒自長泰退據三汊河玉  
洲水頭鎮門諸寨屢遣兵攻石碼江東橋錦又遣其將林耀林英犯泉州提督  
段應舉擊破之獲耀吳淑又自石碼登陸海澄公黃芳世都統孟安擊破之沈  
其舟上令復徙濱海民如順治十八年例邊界守邊穆赫林黃芳世會師灣腰

樹攻國軒師敗績國軒陷平和漳平遂復破海澄段應舉穆赫林及總兵黃藍死之藍梧族芳度所遣詣京師奏事者也國軒進圍泉州詔趣諸軍合擊將軍喇哈達賴塔總督姚啟聖巡撫吳興祚提督楊捷分道並進賢鎬子威以舟師會克平和漳平惠安復解泉州圍啟聖與賴塔等逐國軒至長泰及於蜈蚣山大破之斬四千餘級進克同安斬錦將林欽賴塔又破錦兵萬松關啟聖捷及副都統吉勒塔布等與國軒戰於江東橋於潮溝國軒屢敗副都統瑚圖又擊吳淑於石街盡焚其舟錦歛兵退保思明詔厚集舟師規取金廈十九年興祚出同安與啓聖捷會師自陸路嚮廈門提督萬正色以水師攻海壇分兵爲六隊前進自統巨艦繼又以輕舟繞出左右發炮毀錦師船十六兵三千餘入水死錦將朱天貴引退正色督兵追擊斬錦將吳內林勳湄洲南日平海崇武諸澳皆下天貴出降副都統沃申擊破錦將林英張志水陸並進趨玉洲國軒走還思明錦將蘇堪以海澄降啟聖分遣總兵趙得壽黃大來從賴塔擊破陳洲馬洲灣腰山觀音山黃旗諸寨興祚復與喇哈達等逐錦兵至薄尾遂克廈門

金門錦還臺灣二十年錦卒子克塽自錦出師時爲居守永華請於錦號監國年未冠明察能治事顧乳媼子錫範等意不屬先構罷永華兵永華鬱鬱死及錦卒遂共緝殺克塽奉錦次子克塽嗣爲延平王克塽幼弱事皆決於錫範行人傳爲霖謀合諸將從中起事泄錫範執而殺之並及續順公沈瑞詔用施琅爲水師提督與啓聖規取臺灣二十二年國軒投書啓聖復請稱臣入貢視琉球上趣琅進兵時國軒以二萬人守澎湖六月琅師乘南風發銅山入八罩嶼攻澎湖擊沈錦師船二百斬將吏三百七十有奇兵萬餘國軒以小舟自吼門走臺灣七月克塽使請降琅疏聞上降敕宣撫克塽上降表琅遣侍衛吳啓爵持榜入臺灣諭軍民薙髮八月琅督兵至鹿耳門水淺不得入泊十有二日潮驟長高丈餘羣舟平入臺灣人咸驚謂無異成功初至時也克塽及國軒錫範率諸將吏出降詣京師上授克塽公爵隸漢軍正紅旗國軒錫範皆伯爵諸明宗人依鄭氏者寧靖王術桂自殺魯王子及他宗室皆徙河南上以國軒爲天津總兵召對慰勉眷屬至賜第京師克塽請爲成功子聰錦子克舉等敘官上

特許之光緒初德宗允船政大臣沈葆楨疏請爲成功立祠臺灣

李定國字鴻遠陝西延安人初從張獻忠爲亂與孫可望劉文秀艾能奇並爲獻忠養子獻忠入四川遣諸將分道屠殺定國爲撫南將軍順治三年肅親王豪格率師入四川獻忠死西充可望與定國等及白文選馮雙禮率殘衆自重慶而南四年破遵義入貴州可望令定國襲破臨安屠其城盡下迤東諸郡縣定國等皆自號爲王居年餘可望用任僕議自號爲國主時能奇已前卒定國文秀故儕輩不相下而定國尤崛強六年春可望密與文秀謀藉演武營定國罪縛而杖之百已復相抱哭令取沙定洲自贖定國憾可望念兄事久未可遽發難乃率所部攻定洲定洲降械以歸剝皮死定國兵漸強可望知不可制乃通使桂王思得封爵彈壓諸將桂王封可望公尋進爲王定國與文秀亦自侯進公八年可望遣使迎桂王九年規遷安隆所會定南王孔有德師出河池向貴州可望令定國與馮雙禮將八萬人自黎平出靖州別遣馬進忠自鎮遠出沅州兩軍會武岡圖桂林文秀亦出兵規取成都可望言於桂王進定國西寧

王文秀南康王定國自靖州進陷沅州再進陷寶慶遂破武岡與雙禮兵合有德引師還桂林定國使張勝郭有銘爲前鋒趨嚴關而令雙禮與高文貴斬統武繼其後有德遣兵逆戰驛湖敗績陷全州定國與王之邦劉之麟吳子聖廖魚卜寧率所部自西延大埠疾馳嚮桂林勝有銘已破嚴關有德率師出戰定國軍中象陳略退斬馭象者以徇所部戰甚力驅象突陳有德敗績退保桂林定國晝夜環攻城陷有德自殺定國分兵徇廣西諸郡縣梧州柳州皆下又遣白文選攻陷辰州大將軍敬謹親王尼堪率師南征次湘潭馬進忠引退師從之次衡州定國赴援兩軍同時至戰衡州城下定國敗走敬謹親王自率精騎追之遇伏沒於陳定國收兵屯武岡定國轉戰廣西湖廣下數十城兵屢勝可望益嫉之次沅州召定國計事將以衡州敗爲定國罪而殺之定國察其意辭不赴十年率進忠等犯永州大將軍貝勒屯齊率師自衡州赴之未至定國度龍虎關復入廣西次柳州可望會雙禮追定國自靖州進次寶慶貝勒屯齊遣兵自永州要擊可望敗走還貴陽定國自柳州道懷集攻擊慶師自廣州赴援

戰四會河口定國兵敗移軍破長樂行略高雷廉三府悉屬於定國桂王在安隆馬吉翔爲政遙奉可望指可望謀自帝甚急王懼與大學士吳貞毓謀密遣林青陽敕定國統兵入衛定國感泣議奉迎青陽密使報王王復遣周官鑄屏翰親臣金印賜之定國拜受命十一年事爲吉翔聞啓可望可望怒遣其將鄭國按治殺貞毓青陽及諸與謀者凡十八人獨官走免定國發兵陷高明進圍新城平南王尙可善靖南王耿繼茂赴援次三水將軍珠瑪喇以師會戰於珊瑚洲定國兵敗退保新會師進擊之定國敗走十二年師進次興業再進次橫州江上定國戰屢敗乃道賓州走南寧可喜等撫定高雷廉三府及廣西橫州十三年師進攻南寧定國戰復敗將道安隆入雲南可望訓知之遣白文選移桂王貴陽文選心不直可望因密告王曰姑遲行候西府西府謂定國也定國至文選與共奉王自安南衛入雲南文秀自四川還軍可望令與諸將王尙禮王自奇守雲南亦不直可望遂與沐天波迓王入居可望屏進定國晉王並封文秀文選皆王尙禮等公令文選還貴陽喻意可望奪文秀兵置之軍中定國令

新統武收吉翔將殺之吉翔哀統武爲言於定國召入謁叩頭諂定國定國薦於王使入閣復用事十四年可望舉兵反攻定國起文選爲將留雙禮守貴陽定國與文秀率師禦之遇於三岔河兩軍夾河而陳文選棄其軍奔定國可望遣張勝馬寶自尋甸間道襲雲南而自將當定國戰方合其將馬維興先奔兵盡潰可望走還貴陽定國遣文秀追可望引軍還雲南遇勝於渾水塘獲而殺之寶降定國可望至貴陽雙禮言追兵且至可望乃詣經略洪承疇降雙禮盡取其子女玉帛從文秀歸雲南桂王進雙禮王惟興等公十五年大將軍羅託自湖南吳三桂自四川將軍卓布泰自廣西三道入貴州文秀病卒定國使劉正國楊武守三坡紅關諸隘禦三桂馬進忠守貴州會王自奇關有才貳於定國據永昌舉兵定國自將擊之羅託師自鎮遠入定國不及援卓布泰亦盡下南丹那地獨山諸州兩軍會貴陽進忠遁去三桂師後入至三坡正國拒戰大敗自水西奔還雲南師次開州武迎戰倒流水亦敗遂取遵義王拜定國招討大元帥賜黃鉞謀禦敵三桂亦入貴陽大將軍信郡王多尼至軍會師平越戒

期入雲南定國與雙禮扼雞公背圖復貴州文選守七星關三桂師自遵義趨天生橋出水西克烏撒文選棄關走霑益卓布泰兵次盤江自下流宵濟遂入安隆定國將吳子聖拒戰敗走定國以全軍據雙河口卓布泰師進破象陳迭戰羅炎涼水井定國兵潰妻子俱散失諸將竄走不相顧定國收兵還雲南奉桂王走永昌十六年春師自普安入雲南會城定國使靳統武護桂王走騰越文選自霑益追及定國定國使斷後屯玉龍關師從之文選戰而敗自右甸走木邦師遂克永昌渡潞江陟磨盤山定國使其將寶民望高文貴王璽爲三伏以待師半度以礮發其伏伏起力戰自卯至午短兵接死者如堵牆民望彈穿脅猶持刀潰圍出乃死璽亦死於陳定國坐山巔督戰飛礮墮其前土垒起撲而遂奔退走騰越未至馬吉翔以桂王走南甸統武還從定國雙禮渡金沙江走建昌其部將執以出降桂王入緬甸定國次孟艮如木邦從文選謀分屯邊境文選將入衛王與定國意異定國乃移駐猛緬收殘部勢稍振未幾復移駐孟連賀九儀招文秀將張國用趙得勝歸定國孟艮曾懼定國兼并攻定國定



國擊破之遂據其地號召諸土司起兵沅江土司那嵩應定國三桂討焉嵩自焚死三桂使招九儀定國執而殺之國用得勝皆鞅鞅不爲用定國坐是終不競十七年文選自木邦攻阿瓦求出桂王不克引兵會定國孟艮十八年合兵復攻阿瓦定國上三十餘疏迎桂王爲吉翔所阻不得達文選使密啓王得報書與緬人戰定國軍稍却文選引兵橫擊之緬人大敗退城守然終不肯出桂王復議以舟師攻之造船爲緬人所焚乃移兵次洞郎國用得勝挾文選北走定國還孟艮文選至耿馬遇定國將吳三省方得定國妻子將歸諸定國乃合軍駐錫箔悉江爲險三桂與將軍愛星阿會木邦倍道深入文選降師薄阿瓦緬人執王歸於我師定國自景線走猛臘遣將入車里暹羅諸國乞師皆不應伺邊上求王消息康熙元年聞王凶問號慟祈死六月壬子其生日也病作誠其子及靳統武曰任死荒徼毋降乙丑定國卒統武尋亦卒嗣興乃與文秀子震率所部出降

論曰當鼎革之際勝國遺臣舉兵圖興復時勢旣去不可爲而爲蓋鮮有濟者

徒以忠義鬱結深入於人心陵谷可得更精誠不可得沫煌言勢窮兵散終不肯爲遁死之計成功大舉不克退求自保存先代正朔定國以降將受命敗軍後崎嶇險阻百折而不撓比之擴廓帖木兒陳友定輩何多讓焉即用明史例次於開國羣雄之列旣表先代遺忠並以見其倔强山海間遠至三十餘年近亦十餘年開創艱難卒能定於一非偶然也